

四庫全書

史部

欽定四庫全書

史部

續後漢書卷七十三
上上至
下上

詳校官編修臣黃壽齡

編修臣裴謙覆勘

謄錄舉人臣黃道熈

謄錄舉人臣范翔集

欽定四庫全書

續後漢書卷七十三上

元 郝經 撰

列傳第七十三上

任士

王弼 荀粲 焦贛 龐參

石德林 嵇康

荀爽 郭象 孫登 龐參

禮為修身之綱法為治世之具所以導民彞保恒性軌

物則定王制建皇極謹天道故教不肅而成令不嚴而

行人皆自治天下無事所以無為也禮主於敬法主於
謹敬則心不放非僻邪侈不入而內直謹則國有閑非
僻邪侈不為而外正內直外正心統乎身國統乎人內
外曲防而禮法立禮法立而人道立矣自伏羲氏始為
法制至殷周而極備人人務為禮而天下共守法所以
為二帝三王之治仲尼氏之六經垂萬世之統之綱之
紀為天下大閑使人終日有為而未嘗有為也老聃為
禮者也言道之體而不及用一之乎無為初未害乎道

也莊周才雄識邁隘聖人之常而喜道之變窮原築底而又上之過遠極高入于虛則蕩必為無則罔以禮為桎梏謂放曠為達眇天地蔑萬物皆以為土苴厭然以身心為疣贅窅然忘而棄之直視太初之前茫然以為得託物寓意馳說騁辯十餘萬言自帝堯舜禹湯文武周公孔子及孔門之高弟無不毀訾詬病以尊老聃氏於是索隱行怪之徒蓬首垢面嘯呼而起人道頹圯而天下亂矣然為之者特方士逸民與道家者流爾名教

之人猶未溺乎其中也漢魏之季何晏王弼始好老莊
尚清談謂之玄學學士大夫翕然景嚮流風波蕩不可
防制於是嵇康阮籍籍兄子咸山濤向秀王戎劉伶皆
一時名流跌宕太行之阿號竹林七賢蔑棄禮法褫裂
衣冠糠粃爵祿污穢朝廷婆娑偃蹇遺落世故顛顛癡
癡心死病狂乃敢非薄湯武至於敗俗傷化大害名教
或臨喪而劇飲或逢窮而慟哭或箕踞而為鍛或荷鍤
以自埋解弛樂浪曠然以為高而咸子瞻孚族子修裕

與畢卓謝鯤胡母輔之之徒縱為奇誕公卿大臣亦皆
從史墮敗綱維頓廢機要視天下國家邈然無情而王
衍為尤甚卒使八王稱兵二帝失尊僭亂之禍古
所未有也極其志以為惡師昭之篡代而為之則
亦接輿避世之狂人箕子保身之佯狂也何至於是然
後乃為狂歟琴張曾皙牧皮孔子之所謂狂特以其過
高失中爾未嘗如是也若嵇阮諸人非避世也非保身
也乃真狂爾故目為狂士而著于篇

欽定四庫全書

續後漢書
卷七十三上

三

王弼字輔嗣侍中粲族孫也初粲與從兄凱俱避地荊州劉表欲以女妻粲而嫌其不揚以凱有風貌乃妻凱凱生業蔡邕有書近萬卷盡載與粲粲卒相國掾魏諷反粲二子與焉既被誅曹丕以業嗣粲邕所與書悉入業業字長緒位至謁者僕射生宏及弼宏字正宗終司隸校尉弼幼聰警年十餘歲好老莊書通辯能言業為尚書郎裴徽為吏部郎弼未弱冠往造焉徽異之問弼曰夫無者誠為萬物之所資也然聖人莫肯致言而老

子申之無已者何也弼曰聖人體無無又不可以訓故
不說也老子是有者也故恒言無所不足微甚歎服尋
亦為傅瑕所知而何晏尤竒弼曰仲尼稱後生可畏斯
人者可與言天人之際矣正始中黃門侍郎累缺何晏
既用賈充裴秀朱整又議用弼時丁謚與晏爭衡致高
邑王黎於曹爽爽用黎於是以弼補臺郎初除覲爽請
間爽為屏左右而弼與論道移時無所他及爽啗之時
爽專政黨與共相推進弼通雋不治名黎無幾時病亡

興用王沈代黎弼遂不得在興門晏為之歎恨弼在臺
既淺事功亦雅非所長益不留意焉淮南劉陶善論縱
橫為當時所推每與弼語弼天才卓出當其所得莫能
奪也性和理樂游宴解音律善投壺文辭不及何晏自
然有所拔得多晏也頗以所長陵人故為士君子所嫉
弼與鍾會善會論議以校練為家然每服弼之高致何
晏以為聖人無喜怒哀樂其論甚精鍾會等述之弼不
以為然謂聖人茂於人者神明也同於人者五情也神

明茂故能體沖和以通無五情同故不能無哀樂以應物
然則聖人之情應物而無累於物者也今以其無累便謂
不復應物失之多矣弼立易注潁川荀融難弼作衍義弼
與書曰夫明足以尋極幽微而不能去自然之性顏子之量
孔父之所預注謹案魏志鍾會傳載此書預注作預在然遇之不能無樂喪
之不能無哀又常挾謹案挾注作挾志斯人以為未能以情從理
者也而今乃知自然之不可革足下之量雖已定乎胷
懷之內然而隔踰旬朔何其相思之多乎故知尼父之於

顏子可以無大過矣弼又注老子為之指畧致有理統著道畧論往往有高麗言太原王濟好談病老莊常云見弼易注所悟者多然弼為人淺而不識物情初與王黎荀融善黎奪其黃門郎於是恨黎與融亦不終正始十年曹爽廢以公事免其秋遇厲疾卒時年二十四宋豫章太守范甯著論論何晏及弼曰或曰黃唐緬邈至道淪翳濠濮輟詠風流靡託爭奪兆於仁義是非成於儒墨平叔神懷超絕輔嗣妙思通微振千載之頽綱落周孔之塵

網斯蓋軒冕之龍門濠梁之宗匠嘗聞夫子之論以為
罪過桀紂何哉答曰子信有聖人之言乎夫聖人者德侔
二儀道冠三才雖皇帝殊號質文異制而統天成務曠
代齊趣王何蔑棄典文不遵禮度游辭浮說波蕩後生
飾華言以翳實騁繁文以惑世搢紳之徒翻然改轍洙
泗之風緬焉將墜今仁義幽淪儒雅蒙塵禮壞樂崩中
原傾覆古之所謂言偽而辨行僻而堅者其斯人之徒
歟昔夫子斬少正於魯太公戮華氏於齊豈非曠世而

同誅乎桀紂暴虐正足以滅身覆國為後世鑒戒耳豈
能迴百姓之視聽哉王何叨海內之浮譽資膏粱之傲
誕畫螭魅以為巧扇無檢以為俗鄭聲之亂樂利口之
傾邦信矣哉吾固以為一世之禍輕歷代之罪重自喪
之釁小迷衆之愆大也

荀粲字奉倩尚書令或之子散騎常侍惲之弟也諸兄
並務儒術而粲獨喜談虛玄常以為子貢稱夫子之言
性與天道不可得而聞然則六籍雖存固聖人之糠粃

粲兄侯難曰易云聖人立象以盡意繫辭焉以盡言則微言胡為不可得而聞哉粲曰理之微者非物象之所舉也今稱立象以盡意此非通于意外者也繫辭焉以盡言此非言乎繫表者也斯則象外之意繫表之言固蘊而不出矣當時能言者不能屈也又論父或不如從兄攸或立德高整軌儀以訓物而攸不治外形慎密自居而已粲以此善攸諸兄怒而不能迴也太和初到京邑與傅嘏談嘏善名理而粲尚玄遠宗致雖同倉卒時

或有格而不相得裴徽通彼我之懷為二家騎驛頃之
粲與嘏善亦善夏侯玄常謂嘏玄曰子等在世塗間功
名必勝我但識劣我爾嘏難曰能成功名者識也天下
孰有本不足而末有餘者邪粲曰功名者志局之所獎
也然則志局自一物爾固非識之所獨濟也我能使子
等為貴然未必齊子等所為也粲常以婦人者才智不
足論自宜以色為主驃騎將軍曹洪女有美色粲娶焉
容服帷帳甚麗專房歡宴厯年後婦病亡未殯傳嘏往

啗粲不哭而神傷嘏問曰婦人才色並茂為難子之娶也遺才而好色此自易遇今何哀之甚粲曰佳人難再得痛悼不能已歲餘亦卒時年二十九

原注世說粲與婦至萬冬月婦

病熱乃出中庭自取冷還以身熨之

粲簡貴不與常人交至葬夕赴者裁

十餘人皆同時知名士也

議曰孔氏之門易道傳於顏曾子思孟軻氏如大學中庸及七篇其理皆易而不及卦爻象數亦不援引上下經及大傳之文可謂善藏其用矣漢儒推本授受之目則

曰孔子傳之商瞿子木漢興而有田何丁寬代遠而不見其文或有見焉第卜筮占驗之迹未有言其理者也獨王弼之注著漢魏傳注之學辭旨簡奧各就條貫最為折中然後知漢儒之所傳亦孔門真是之原也特弼之學流于老莊時亂其理於是疵而未醇惜哉初晏弼雖好老莊宗虛玄尚清談猶未敢放言高論至粲乃無忌憚輒以六經為糠粃強辯以肆其狂於是誕妄之徒聞風而起則粲之罪有甚晏弼者嗚呼自謂知道得於

象外言表乃好色而死于欲其所謂道果何道耶

焦先字孝然河東人也中平末白波賊起先年二十餘與同郡侯武陽避亂武陽年小有母先與相扶接東客揚州建安初西還武陽詣大陽占戶先留陝界復遭亂失家屬獨竄河渚間食草飲水無衣履大陽長朱南見之謂為亡士欲遣船捕之武陽聞而告南曰是吾友也狂癡人爾遂注籍給稟日五升後大疫人多死者縣常使埋瘞童兒豎子皆輕易之然其行不踐邪徑必循阡

陌及捃拾不取大穗飢不苟食寒不苟衣結草以為裳
科頭徒跣每見婦人則自隱翳須去乃出自作蝸廬灑
掃其中編木為牀布草蓐其上天寒爇火以自炙呻吟
獨語飢則出為人客作飽食而已不取其直人或遺之
食及衣物不受或數日一食或數日不食於道中與人
相遇輒下道藏匿或問其故常言草茅之人狐兔同羣
未嘗妄語雖有驚急亦不遽言或詈辱之不顧也一日
為野火焚其廬不復結處草木中裸土枕塊五形盡露

體如泥漆冬雪大至赤卧不移人以為死往視之即驚
走避之魏青龍中嘗持一杖南渡淺河水輒獨云未可
也由是人頗疑其不狂嘉平中太守賈穆之官過先
見穆與語不應與食不食穆謂之曰國家使我來為卿
作君食卿而不食與卿語而不應如是我之不中為卿作
君當去爾先乃曰寧有是耶遂不復語明年大發卒伐
吳有竊問先今討吳何如先不應而謬歌曰祝𪊑祝𪊑非
魚非肉更相追逐本心為當殺牂羊更殺其殺𪊑邪郡

人不知其謂會諸軍敗好事者乃推其意牂羊謂吳
殺獍謂魏於是人僉謂之隱者也議郎河東董經素不
識先密往觀之見先奮其鬚髯為如與之有舊者謂曰
阿先闊乎念共避白波時不先熟視不言經知其與武
陽厚復曰念武陽不邪先乃曰已報之矣經又復挑與
語遂不復應後歲餘病卒時年百餘歲矣安定皇甫謐
曰焦先何人也曰吾不足以知之考之於表可畧而言
矣夫世之所常趣者榮味也形之所不可釋者衣裳也

身之所不可離者室宅也口之所不能已者言語也心之所不可絕者親戚也今焦先棄榮味釋衣服離室宅絕親戚閉口不言曠然以天地為棟宇闇然合至道之前出羣形之表入玄寂之幽一世之人不足以挂其意四海之廣不能以回其顧妙乎與三皇之先同矣結繩以來未及其至也豈羣言之所能髣髴常心之所得測量哉彼行人所不能行堪人所不能堪犯寒暑不傷其性居曠野不恐其形遭驚急不迫其慮離榮愛不累其

心捐視聽不污其耳目舍足於不損之地居身於獨立之處延年歷百壽越期頤雖上識不能尚也自義皇以來一人而已矣故梁州刺史耿黼以先為仙人也傳玄

謂之性同禽獸並為之傳云

原注高士傳曰世莫知先所出或言生乎漢末自陝

居大陽無父母兄弟妻子見漢世衰乃自絕不言及魏受禪常結草為廬于河之渚獨止其中冬夏常不著衣卧不設席又無草蓐以身親土其體垢污皆如泥漆五行盡露不行人間或數日一食欲食則為人賃作人以衣衣之乃使限功受直足得一食輒去人欲多與終不肯取亦有數日不食時行不由邪徑目不與女子逆視口未嘗言雖有驚急不與人語遣以食物皆不受河東太守杜恕嘗以衣服迎見而不與語司馬景王聞而不足

安定太守董經因事過視又不肯語經以為大賢其後野火燒其廬先因露寢遺冬雪大至先袒卧不移人以為死就視如故不以為病人莫審其意度年可百歲餘乃卒

扈累字伯重京兆人也初平中山東人有青牛先生者字正方客三輔曉知星歷風角鳥情常食青葙光華如五六十者人或識之謂其已百餘歲矣累年四十餘隨正方游學人謂之得其術

謹案志注此下有婦無子四字

建安中三

輔亂隨正方南入漢中正方入蜀累與相失隨徙民詣鄴遭疾疫喪其婦黃初元年又徙詣洛陽不復娶婦獨

居道側以甌

原注力不反

甌為障施一厨牀食宿其中晝日

潜思夜則仰視吟咏內書人或問之閉口不言嘉平中年八九十若四五十者縣官以其孤老給粟日五升不足食頗為人傭作飽則復入人與食不食又數年卒百餘歲矣

石德林者

謹案志注云寒貧者本姓石字德林

安定人也建安初客三輔時

長安有宿儒樂文博門徒數十

謹案志作數千

德林亦就學始

精詩書後好內事於衆輩中最玄默關中亂南入漢中

不治產業不畜妻孥常讀老子五千文及諸內書晝夜

吟詠二十五年漢中破隨衆還長安遂佯狂

謹案志作癡愚

不

復識人食不求味冬夏衣敝布連結不拊體目如無所

見獨居窮巷人與之衣食不受郡縣以其鰥窮給廩曰

五升食不足頗行乞乞不取多人問其姓字閉口不言

故因號之曰寒貧或素知識者往存卹之輒拜而去人

因以為不癡車騎將軍郭淮以意氣呼之問其所欲亦

不言淮因與脯糒及衣不受取脯一朐糒一升而去後

不知所往

議曰先等外形骸廢倫類自同土木而羣乎麋鹿直以辟漢之亂故佯狂爾何必爾邪伯夷太公俱辟紂者也聞文王作興而歸之箕子亦狂者也武王勝殷而事之隱見各以其時爾故孔子曰賢者辟世其次辟地其次辟色其次辟言苟道不行辟之而已又何必狂哉又曰鳥獸不可與同羣吾非斯人之徒與而誰與又何必自同麋鹿哉當是之時卓紹操懿篡弑攘奪固當辟之昭烈帝室之胄明于王道討賊興漢以

孔明之高卧猶且歸之先游於雍涼之間聞其作興何不從之邪故先非辟世也特喪心發狂至是極爾其中固無有也故特列之狂士皇甫士安儒者也盛為稱道謂羲皇以來所未有豈知言哉

嵇康字叔夜譙國錕人也其先姓奚會稽上虞人以辟

怨徙錕錕有嵇山家於其側因以為氏

謹案虞預晉書曰先自會稽遷

於燕之錕縣改為嵇氏取稽字之上加山以姓蓋以志其本也一曰錕有嵇山家于其側遂氏焉

兄喜

幹敏有治理歷太僕宗正康早孤有奇才文辭壯麗身

長七尺八寸美風儀而土木形骸不自藻飾人以為龍
章鳳姿天質自然好老莊以宗室戚屬拜中散大夫常
修養性服食之事彈琴詠詩以自娛樂謂神仙裏之自
然非積學所得至於導養得理則安期彭祖之倫可及
也乃著養生論曰世或有謂神仙可以學得不死可以
力致者或云上壽百二十古今所同過此以往莫非妖
妄者

原注養生經黃帝問天老曰人生上壽一百二十
年中壽百年下壽八十年而竟不然者皆夭爾

此

皆兩失其情請試粗論之夫神仙雖不目見然記籍所

載前史所傳較而論之其有必矣似特受異氣稟之自

然非積學所能致也至於導養得理以盡性命上獲千

餘歲下可數百年可有之爾

原注養生經老子曰人生大期以百二十年為限節

度護之可至千歲

而世皆不精故莫能得之何以言之夫服藥

求汗或有弗獲而愧情一集渙然流離

原注漢書上問左丞相勃曰天

下一歲決獄幾何勃謝不知問天下錢穀一歲出入幾何勃又謝不知汗出洽背媿不能對

終朝未

餐則囂然思食而曾子銜哀七日不飢

原注禮記曾子謂子思曰臣吾

執親之喪也水漿不入於口者七日

夜分而坐則低迷思寢內懷殷憂則

達旦不瞑

原注古
眠字

勁刷理鬢醇醴發顏僅乃得之壯

士之怒赫然殊觀植髮衝冠

原注淮南子荆軻瞋目裂皆髮植衝冠

由

此言之精神之於形骸猶國之有君也神躁於中而形喪於外猶君昏於上國亂於下也夫為稼於湯之世偏有一溉之功者雖終歸於焦爛必一溉者後枯然則一溉之益固不可誣也而世常謂之一怒不足以及侵性一哀不足以傷身輕而肆之是猶不識一溉之益而望嘉穀於旱苗者也是以君子知形恃神

以立神須形以存悟生理之易失知一過之害生故修
性以保神安心以全身愛憎不棲於情憂喜不留於意
泊然無感而體氣和平又呼吸吐納服食養身使形神
相親表裏俱濟也夫種田者一畝十斛謂之良田此天
下之通稱也不知區種可百餘斛原注汜勝之田農書
上農區田大區方深
各六寸相去七十一畝三千七百區丁男女治
十畝至秋收區三升粟畝得百斛也區郵侯切田種一
也至於樹養不同則功收相縣謂商無十倍之價農無
百斛之望此守常而不知變者也且且令人重榆令人

瞑原注博物志食豆三年則身重合歡蠲忿萱草忘憂

原注見神農本草行止難咳榆則瞑不欲覺也

愚智所共知也薰辛害目豚魚不養常世所

識也原注養生要曰大蒜勿食葷辛害目蟲處頭而黑

麝食柏而香原注抱朴子今頭蟲著身皆稍變而白身

易存乎所漸本草名醫云麝香形似麝常食柏葉五月得香又夏月食蛇多至寒香滿入春患急痛以脚剔

去著矢溺中覆之皆有常頸處險而瘦齒居晉而黃推

此而言凡所食之氣蒸性染身莫不相應豈惟蒸之使

重而無使輕害之使闇而無使明薰之使黃而無使堅

芬之使香而無使延哉故神農曰上藥養命中藥養性

者

原注本草上藥一百二十種為君主養命以應天無毒久服不傷人輕身益氣不老延年中藥一百二十

種為臣主養性以應人

養生經上藥養命五石

練形六芝延年中藥養性合歡蠲忿萱草忘憂也誠知

性命之理因輔養以通也而世人不察惟五穀是見聲

色是耽目惑玄黃耳務淫哇滋味煎其府藏醴醪原注

今養字

其腸胃香芳腐其骨髓喜怒悖其正氣思慮銷其

精神哀樂殃其平粹夫以叢爾之軀攻之者非一塗易

竭之身而外內受敵身非木石其能久乎其自用甚者

飲食不節以生百病好色不倦以致乏絕風寒所災百毒所傷中道夭於衆難世皆知笑悼謂之不善持生也

至於措身失理亡之於微積微成損積損成衰從衰得白從白得老從老得終悶若無端中智以下謂之自然縱少覺悟咸歎恨於所遇之初而不知慎衆險於未兆是猶桓侯抱將死之疾而怒扁鵲之先見以覺痛之日為受病之

始也

原注韓子扁鵲謂桓侯曰君疾在腠理猶可湯熨桓侯不信後病迎扁鵲扁鵲逃之桓侯遂死史記

扁鵲療簡子東過齊見桓侯東哲曰齊桓在簡子前且二百歲小白後無齊桓侯田和子有桓公午去簡子首

宋相距二百八年史記自為舛錯韋昭曰魏無桓侯臣
贊曰魏桓侯新序曰扁鵲見晉桓侯然此之桓侯竟不
知何害成于微而救之於著故有無功之治馳騁常人
國也

之域故有一切之壽仰觀俯察莫不皆然以多自證以
同自慰謂天地之理盡此而已矣縱聞養生之事則斷

以所見謂之不然其次狐疑雖少庶幾莫知所由其次

自力服藥半年一年勞而未驗志以厭衰中路復廢或

益之以畎澮而泄之以尾閭

原注莊子海若曰天下之
水莫大於海萬川歸之不

知何時止而不盈尾閭泄之不知何時已而不虛司馬
彪曰尾閭水之從海出者也一名沃焦在東大海之

欽定四庫全書

卷七十三上

中尾者在百川之下故稱尾閭者聚也水聚族之處故稱閭也在扶桑之東有一石方圓四萬里厚四萬里海水注者無不焦盡故名沃焦欲坐望顯報者或抑情忍欲割去榮願

而嗜好常在耳目之前所希在數十年之後又恐兩失內懷猶豫心戰於內物誘其外交賒相傾如此復敗者夫至物微妙可以理知難以目識譬猶豫章生七年然後可覺爾今以躁競之心涉希靜之塗意速而事遲望近而應遠故莫能相終夫悠悠者既以未效不求而求者以不專喪業偏恃者以不兼無功追術者以小道自溺

凡若此類故欲之者萬無一能成也善養生者則不然矣清虛靜泰少思寡欲知名位之傷德故忽而不營非欲而彊禁也識厚味之害性故棄而弗顧非貪而後抑也外物以累心不存神氣以醇泊獨著曠然無憂患寂然無思慮又守之以一養之以和和理日濟同乎大順然後蒸以靈芝潤以醴泉晞以朝陽綏以五絃無為自得體妙心玄忘歡而後樂足遺身而後身存若此以往庶可與羨門比壽王喬爭年何為其無有哉又以為君子無私著

論曰夫稱君子者心不措乎是非而行不違乎道者也
何以言之夫氣清神虛者心不存於矜尚體亮心達者
情不繫於所欲矜尚不存乎心故能越名教而任自然情
不繫於所欲故能審貴賤而通物情物情順通故大道無
違越名任心故是非無措也是故言君子則以無措為至
以通物為美言小人則以匿情為非以違道為闕何者匿
情矜吝小人之至惡虛心無措君子之篤行也是以大道
言及吾無身吾又何患無以生為貴者是賢於生貴也由

斯而言夫至人之用心故不存有措矣故曰君子行道
忘其為身斯言是矣君子之行賢也不察於有度而後
行也任心無邪不議於善而後正也顯情無措不論於
是而後為也是故傲然忘賢而賢與度會忽然任心而
心與善遇儻然無措而事與是俱也其畧如此尤曉音
律善鼓琴每撫弄暢適超然自得自謂夔曠合為一人
乃作琴賦曰余少好音聲長而翫之以為物有盛衰而
此無變滋味有厭而此不勌可以導養神氣宣和情志

處窮獨而不悶者莫近於音聲也是故復之而不足則吟詠以肆志吟詠之不足則寄言以廣意然八音之器歌舞之象歷世才士並為之賦頌其體制風流莫不相襲稱其才翰則以危苦為上賦其聲音則以悲哀為主美其感化則以垂涕為貴麗則麗矣然未盡其理也推其所由似元不解音聲覽其旨趣亦未達禮樂之情也衆器之中琴德最優故綴叙所懷以為之賦其辭曰惟嵒梧之所生兮託峻嶽之宗岡披重壤以誕載兮參辰

極而高驤含天地之醇和兮吸日月之休光鬱紛紜以獨

茂兮飛英蕤於昊蒼夕納景于虞淵兮旦晞幹於九陽

原注淮南子曰入于虞淵之
汜楚辭夕晞余身乎九陽

經千載以待價兮寂神時而永

康且其山川形勢則盤紆隱深確嵬岑竑玄嶺巉巖岵

崿嶇崦丹崖嶮巖青壁萬尋若乃重巘增起偃蹇雲覆邈

隆崇以極壯崛巍巍而特秀蒸靈液以播雲據神淵而吐

溜爾乃顛波奔突狂赴爭流觸巖舐隈鬱怒彪休洶湧騰

薄奮沫揚濤潑汨澎湃

原注潑阻瑟反汨莫歷
反澎湃衛反湃普拜反

蜃螳相糾

原注蜃於

阮

放肆大川濟乎中州安回徐邁寂爾長浮澹乎洋洋縈抱

山丘詳觀其區土之所產毓興宇之所實殖珍怪琅玕瑤瑾

翕絕叢集累積負衍於其側若乃春蘭被其東沙棠殖其西

涓子宅其陽

原注列仙傳涓子者齊人好餌水著天地人經三十八篇釣於澤得符鯉魚中隱于宕山能致

風雨造伯陽九山法淮南王少得文不能解其音旨其琴心三篇有條理焉

玉醴涌其前玄雲陰

其上翔鸞集其巔清露潤其膚惠風流其間疎肅肅以靜

謐密微微其清閒夫所以經營其左右者固以自然神麗

而足思願愛樂矣于是邈世之士榮期綺季之儔乃相與

登飛梁越幽壑援瓊枝陟峻嶒以游乎其下周旋永望
邈若凌飛邪睨崑崙俯闕海湄指蒼梧之迢遞臨迴江
之威夷悟時俗之多累仰箕山之餘輝羨斯嶽之弘敞

心慷慨以忘歸情舒放而遠覽接軒轅之遺音慕老童

於騄

原注俱位反

隅欽泰容之高吟

原注山海經騄山神者童居之其音常如鐘磬

郭璞注者童老童也顓頊之子思立賦
太容吟日念哉騄山在三危西九十里

顧茲梧而興慮

思假物以託心乃斲孫枝準量所任至人攄思製為雅琴

乃使離子督墨匠石奮斤

原注莊子黃帝亡其玄珠使離婁索之能視百思之外見

欽定四庫全書

卷七十三上上

秋毫之末郢人墮漫其鼻端若蠅翼使匠石斲之匠石運斤成風聽而斲之盡墮而鼻不傷夔襄薦

法殷倭騁神

原注夔師襄魯殷倭也

鈗會襄夙朗密調均華繪彫

琢布藻垂文錯以犀象藉以翠綠絃以園客之絲徽以

鍾山之玉

原注列仙傳園客者濟陰人也常種五色香草積數十年食其實一旦有五色神蛾止香

樹末客收而薦之以布生桑蠶焉時有好女夜至自稱我與君作妻道蠶狀客與居蠶得百頭繭皆如甕綠繭六十日乃盡訖則俱去莫知所如許慎曰鍾山北陸無日之地出美玉爰有龍鳳之象古

人之形伯牙揮手鍾期聽聲華容灼爚發采揚明何其

麗也伶倫比律田連掾張

原注漢書黃帝使伶倫自大夏之西崑崙之陰取竹於嶰

谷斷兩節間而吹之以為黃鍾之宮制十二簫以聽風
風之鳴以此黃鍾之宮皆可以生之是為律本 韓子
田連成竅天下善鼓琴者也然而
田連鼓上成竅擲下而不成曲 進御君子新聲惝亮

何其偉也及其初調則角羽俱起宮徵相證參發並趣
上下累應蹠蹠磔硤美聲將興固以和昶而足耽矣爾
乃理正聲奏妙曲揚白雪發清角紛淋浪以流離魚淫
衍而優渥粲奕奕而高逝馳岌岌以相屬沛騰還而競
趣翕韡眩而繁縟狀若崇山又象流波浩兮湯湯鬱兮
戔戔悌悌煩冤紆餘娑娑陵縱播逸霍蔑紛葩檢容授

節應變合度競名擅業安軌徐步洋洋習習聲烈遐布
含顯媚以送終飄餘響乎泰素若乃高軒飛觀廣厦閒
房冬夜肅清朗月垂光新衣翠粲纓徽流芳於是罷冷

絃調心閒手敏觸挽

原注蒲結反

如志唯意所擬初涉淥水

中奏清徵雅昶唐堯終詠徵子

原注堯暢徵子皆琴寬
搽王遠曰昶與暢同

明弘潤優遊躊躇拊絃安歌新聲代起歌曰凌扶搖兮

憩瀛洲要列子兮為好仇

原注列子名禦寇鄭
人與鄭穆公同時

餐沆瀣

兮帶朝霞眇翻翻兮薄天遊齊萬物兮超自得委性命

兮任去留激清響以赴會何絃歌之綢繆於是曲引向

闌衆音將歇改韻易調奇弄乃發揚和顏攘皓腕飛纖

指以馳騫紛儼喜以流漫

原注說文儼不及也師立反嘉疾言也徒合反

或徘徊

回顧慕擁鬱抑按盤桓毓養從容祕翫聞爾奮逸風駭

雲亂牢落凌厲布濩丰散豐融披離斐韡英爛英聲發越

采采粲粲或間聲錯揉狀若詭赴雙美並進駢馳翼驅

初若將乖後卒同趣或曲而不屈或直而不倨或相凌而

不亂或相離而不殊時劫掎以慷慨或怨嬗

原注子而魚反

躊躇忽飄颻以輕邁乍留聯而扶疏或參譚繁促複疊

攢仄從橫駱驛奔遯相逼拊嗟累讚間不容息瓌艷奇

偉殫不可識若乃閒舒都雅洪纖有宜清和條昶案衍

陸離穆溫柔以怡懌婉順叙而委蛇或乘險投會邀隙

趨危譽

原注
音嬰

若離鵑鳴清池翼若遊鴻翔曾崖紛文斐

尾慊終離纚微風餘音靡靡猗猗或樓挽櫟將縹緲澈列

輕行浮殫明嫿睒

原注七
祭反

慧疾而不速留而不滯翩緜

飄邈微音迅逝遠而聽之若鸞鳳和鳴戲雲中迫而察

之若衆葩敷榮曜春風既豐贍以多姿又善始而令終
嗟姣妙以弘麗何變態之無窮若夫三春之初麗服以
時乃攜友生以遨以嬉涉蘭圃登重基背長林翳華芝
臨清流賦新詩嘉魚龍之逸豫樂百卉之榮滋理重華
之遺搽原注謂
舜搽也慨遠慕而長思若乃華堂曲宴密友近
賓蘭肴兼御旨酒清醇進南荆發西秦紹陵陽度巴人
變用襍而並起竦衆聽而駭神料殊功而比搽豈笙簧
之能倫若次其曲引所宜則廣陵止息東武太山飛龍

鹿鳴鷗雞遊絃

原注八曲皆琴操也

更唱迭奏聲若自然流楚窈

窕懲踈雪煩下逮謠俗蔡氏五曲

原注五曲謂游春添水坐愁秋思幽居也

王昭楚妃千里別鶴

原注三曲皆琴操也有楚妃樊姬也 有楚妃歎商陵牧子

作別鶴操謂鶴一舉千里故名千里別鶴

猶有一切承間造乏亦有可觀者

焉然非夫曠遠者不能與之嬉遊非夫淵靜者不能與

之閒止非夫放達者不能與之無羣非夫至精者不能

與之析理也若論其體執詳其風聲器和故響逸張急

故聲清間遼故音痺絃長故徽鳴性潔靜以端理含至

德之和平誠可以感盪心志而發洩幽情矣是故懷戚

者聞之莫不惜

原注七戚反

懷慘悽愀愴傷心含哀懊咿不

能自禁其康樂者聞之則歛

原注況于反

愉懽釋抃舞踊溢

留連瀾漫嗷嗷

原注上烏沒反下巨畧反

終日若和平者聽之則怡

養悅愈淑穆玄真恬虛樂古棄事遺身是以伯夷以之

廉顏回以之仁比干以之忠尾生以之信惠施以之辨

給萬石以之訥慎其餘觸類而長所至非一同歸殊途

或文或質總中和以統物咸日用而不失其感人動物

蓋亦弘矣于時也金石寢聲艷竹屏氣王豹輟謳狄牙喪

味

原注淮南子溜澠之水合狄牙嘗而知之

天吳踊躍於重淵

原注山海經朝陽之谷有

神名曰天吳是為水伯其形首足尾並人面而色青

王喬披雲而下墜舞鸞鸞於

庭階游女飄焉而來萃感天地以致和況蚊行之衆類

嘉斯器之懿茂詠茲文以自慰永服御而不厭信古今

之所貴亂曰惜惜琴德不可測今體清心遠邈難極兮良質

美手遇今世兮紛綸翕響冠衆藝兮識音者希孰能珍

兮能盡雅琴唯至人兮其宵懷所寄以高契難期每思

郢質所與為神交者陳留阮籍河內山濤豫其流者河
南向秀沛國劉伶籍兄子咸琅邪王戎遂為竹林之遊
世謂之竹林七賢戎自言與康居山陽二十年未嘗見
其喜愠之色康嘗採藥游山澤會其得意忽焉忘反樵
蘇者遇之謂為神人至汲郡山中見孫登從之遊登無
所言康辭去登曰君性烈而才多識寡
謹案才多識寡
晉書多字作雋
難乎免矣康又遇王烈共入山得石髓如飴烈自服半
餘半與康皆凝為石又於石室中見素書一卷遽呼康

往取輒不復見烈乃歎曰叔夜志趣非常而輒不遇命也山濤將去選官舉康自代康乃與濤書告絕曰足下昔稱吾於潁川吾常謂之知言然經怪此意尚未熟悉於足下何從便得之前年從河東還顯宗阿都說足

下議以吾自代

原注晉氏八王故事注公孫崇字顯宗譙國入為尚書郎嵇康文集錄注阿

都呂仲悌東平人也康與呂長悌絕交書曰少知阿都志力閑華每喜足下家復有此弟事雖不行

知足下故不知之足下傍通多可而少怪吾直性狹中多所不堪偶與足下相知爾間聞足下遷惕然不喜恐足

下羞庖人之獨割引尸祝以自助

原注莊子庖人雖不治庖尸祝不越樽俎

而代

手荐鸞刀漫之羶腥故具為足下陳其可否吾昔

讀書得并介之人或謂無之今乃信其真有爾性有所
不堪真不可強今空語同知有達人無所不堪外不殊
俗而內不失正與一世同其波流而悔吝不生爾老子莊
周吾之師親居賤職抑下惠東方朔達人也安乎卑位
吾豈敢短之哉又仲尼兼愛不羞執鞭子文無欲卿相
而三登令尹是乃君子思濟物之意也所謂達能兼善

而不渝窮則自得而無悶以此觀之故堯舜之君世許由之巖棲子房之佐漢接輿之行歌其揆一也仰瞻數君可謂能遂其志者也故君子百行殊塗而同致循性而動各附所安故有處朝廷而不出入山林而不反之

論且延陵高子臧之風長卿慕相如之節

原注史記司馬相如字長

卿其親名之夫子相如既學慕蘭相如之為人更名相如

志氣所託不可奪也吾每

讀尚子平臺孝威傳慨然慕之想其為人

原注英雄記尚子平有道

術為縣功曹休歸自入山擔薪賣以供食飲後漢書向子平隱居不仕性尚中和好通老易尚向不同未詳

臺佟者字孝威魏郡人隱於武安山鑿穴為居采藥為業

少加孤露母兄見驕不涉

經學性復疏嬾筋駕肉緩頭面常一月十五日不洗不大悶癢不能沐也每常小便而忍不起令胞中畧轉乃起爾又縱逸來久情意傲散簡與禮相背嬾與慢相成而為儕類見寬不攻其過又讀莊老重增其放故使榮進之心日頽任實之情轉篤此由禽鹿少見馴育則服從教制長而見羈則狂顧頓纓赴蹈湯火雖飾以金鑣饗以嘉肴逾思長林而志在豐草也阮嗣宗口不論人

過吾每師之而未能及至性過人與物無傷惟飲酒過
差爾至為禮法之士所繩疾之如讎幸賴大將軍保持
之爾吾不如嗣宗之賢而有慢弛之闕又不識人情闇
於機宜無萬石之慎而有好盡之累久與事接疵釁日
興雖欲無患其可得乎又人倫有禮朝廷有法自惟至熟
有必不堪者七甚不可者二卧喜晚起而當關呼之不
置一不堪也抱琴行吟弋釣草野而吏卒守之不得妄
動二不堪也危坐一時痺不得搔坐復多蟲把搔無已

而當裏以章服揖拜上官三不堪也素不便書又不喜作書而人間多事堆案盈几不相酬答則犯教傷義欲自勉強則不能久四不堪也不喜弔喪而人道以此為重已為未見恕者所怨至欲見中傷者雖瞿然自責然性不可化欲降心順俗則詭故不情亦終不能獲無咎無譽如此五不堪也不喜俗人而當與之共事或賓客盈坐鳴聲聒耳囂塵臭處千變百伎在人目前六不堪也心不耐煩而官事鞅掌機務纏其心世故繁其慮七

不堪也又每非湯武而薄周孔在人間不止此事會顯
世教所不容此甚不可一也剛腸疾惡輕肆直言遇事
便發此甚不可二也以促中小心之性統此九患不有
外難當有內病寧可久處人間邪又聞道士遺言餌木
黃精令人久壽意甚信之遊山澤觀魚鳥心甚樂之一
行作吏此事便廢安能舍其所樂而從其所懼哉夫人
之相知貴識其天性因而濟之禹不偪伯成子高全其
節也仲尼不假蓋於子夏護其短也

原注家語孔子將行雨無蓋門人曰

商也有焉孔子曰商之為人也膏短於財吾聞與人交者推其長者達其短者故能久也近諸葛孔

明不偪元直以入蜀華子魚不强幼安以卿相此可謂

能相終始真相知者也足下見直木必不可以為輪曲

者必不可以為桶蓋不欲以枉其天才令得其所也故

四民有業各以得志為樂惟達者為能通之此足下度

內爾不可自見好章甫强越人以文冕也原注莊子宋人資章甫而

通越越人敦髮文身無所用之敦斷也已嗜臭腐養鵝雛以死鼠也原注莊子

惠子相梁莊子往見之或謂惠子曰莊子來欲代子相於是惠子恐搜於國中三日三夜莊子往見之曰南方

有鳥名鷦鷯子知之乎夫鷦鷯雖發南海而飛於北海非梧桐而不止非竹實而不食非醴泉而不飲於是鷦鷯得
腐鼠鷦鷯雖過之仰天而視之曰赫今子欲以子國嚇我邪吾頃學養生之術方外榮

華去滋味游心於寂寞以無為為貴縱無九患尚不顧
足下所好者又有心悶疾頃轉增篤私意自試不能堪
其所不樂自卜已審若道盡途窮則已爾足下無事寬
之令轉於溝壑也吾新失母兄之歡意常悽切女年十
三男年八歲未及成人況復多病顧此恨恨如何可言
今但願守陋巷教養子孫時與親舊叙濶陳說平生濁

酒一盃彈琴一曲志願畢矣足下若勦之不置

原注勦

音義與撓同奴了反

不過欲為官得人以益時用爾足下舊知吾

潦倒麤疎不切事情自惟亦皆不如今日之賢能也若以俗人皆喜榮華獨能離之以此為快此最近之可得言爾然使長才廣度無所不淹而能不營乃可貴爾若吾多病困欲離事自全以保餘年此真所乏爾豈可見黃門而稱貞哉若趣欲共登王塗期於相致時為懼益一旦迫之必發其狂疾自非重怨不至於此也野人有

快炙背而美芹子者欲獻之至尊

原注列子宋國有田父常衣濕簑至春自

暴於日當爾時不知有廣厦隩室絺纈狐貉顧謂其妻曰負日之暄人莫知之以獻吾君將有賞也其室告之曰昔人有美哉菽甘泉莖芹萍子者對鄉豪稱之鄉豪取嘗之苦於口慘於腹衆哂之

雖有區區

之意亦已疏矣願足下勿似之其意如此既以解足下

并以為別司馬昭見而惡之康性好鍛宅中一柳甚茂

激水圍之當盛夏袒裼鍛於其下以為樂時鍾會有寵

於昭聞康名而造焉康箕踞而鍛不為之禮會將去康

曰何所聞而來何所見而去會曰聞所聞而來見所見

而去遂深銜之東平呂安慕康高致每一相思輒千里命駕其後安兄巽誣安不孝康為證其不然安遂逮繫會因言於昭曰康卧龍也不為公起公無憂天下顧以康為慮爾且聞康欲助母丘儉昔齊戮華士

魯誅少正卯

原注韓子太公封於齊東海上有居士任商華士昆弟二人立議曰吾不臣天

子不友諸侯耕而食之掘而飲之吾無求於人也無上之名無君之祿不事仕而事力太公使執而殺之以為首誅周公從魯聞之急傳而問曰二子賢者也今日饗國殺之何也太公曰是昆弟立議曰不臣天子是望不得而臣也不友諸侯是望不得而使也耕而食之掘而飲之無求於人是望不得以賞罰勸禁

也且夫君之所以使臣者非爵祿則刑罰也今四者
不足以使之則望誰為君乎是以誅也家語孔子
為魯相攝朝七日而誅少正卯門人進問曰夫少正
卯魯之聞人也夫子為政而始誅之得無失乎孔子
曰居吾語汝其故人有惡者五而盜竊不與焉一曰
心達而險二曰行僻而堅三曰言偽而辯四曰記醜
而博五曰順非而澤此五者有一於人則不得免於
君子之誅而少正卯無有之故居處足以聚徒成羣言
談足以飾邪營眾彊禦足以反是獨誠以害時亂教
立此小人之桀雄也不可誅也

聖賢不得不誅爾康等言論放蕩無父無君毀訾湯武非

聖無法且潛圖不軌宜因釁除去以懿風俗昭遂殺安及

康

原注世語毋丘儉反康有力且欲起兵應之以問山
濤山濤曰不可儉亦已敗裴松之曰本傳云康以景

元中坐事誅而干寶孫盛習鑿齒諸書皆云正元二年
司馬文王反自樂嘉殺嵇康呂安蓋緣世語云康欲舉
兵應母丘儉故謂破儉便應殺康也其實不然山濤為
選官欲舉康自代康書告絕事之明審者也案濤行狀
濤始以景元二年除吏部郎爾景元與正元相較七八
年以濤行狀檢之如本傳為審又鍾會傳亦云會作司
隸校尉時誅康會作司隸景元中也干寶云呂安兄
善於鍾會巽為相國掾俱有寵於司馬文王故遂抵安
罪尋文王以景元四年鍾鄧平蜀後始授相國位若巽
為相國掾時陷安焉得以破母丘儉年殺嵇呂此又干
寶之疏謬自相違戾也

康始逮獄作幽憤詩曰嗟余薄祜少遭不

造哀亮靡識越在絰縲母兄鞠育有慈無威恃愛肆姐
不訓不師爰及冠帶憑寵自放抗心希古任其所尚託

好老莊賤物貴身志在守璞養素全真曰余不敏好善
闇人子玉之敗屢增惟塵大人含弘藏垢懷恥民之多
僻政不由己惟此褊心顯明臧否感悟思愆悛若創痛
欲寡其過謗議沸騰性不傷物頻致怨憎昔慚柳惠今
愧孫登內負宿心外慙良朋仰慕嚴鄭樂道閒居與世
無營神氣晏如咨予不淑嬰累多虞匪降自天實由頑
疎理弊患結卒致囹圄對答鄙訊繫此幽阻實恥訟免
時不我與雖曰義直神辱志沮澡身滄浪豈云能補嗚

嗷鳴鴈奮翼北遊順時而動得意忘憂嗟我憤歎曾莫
能傳事與願違道茲淹留窮達有命亦又何求古人有言
善莫近名奉時恭默咎悔不生萬石周慎安親保榮世
務紛紛祇攬予情安樂必誠乃終利貞煌煌靈芝一年
三秀予獨何為有志不就懲難思復心焉內疚庶勗將
來無聲無臭采薇山阿散髮巖岫永嘯長吟頤性養壽
將刑東市太學生三千人請以為師勿許康顧視日影
索琴彈之曰昔袁孝尼嘗從吾學廣陵散吾每靳之廣

陵散於今絕矣時年四十海內之士莫不寃之初康嘗
遊洛西宿華陽亭彈琴至夜分忽有客謁康自稱為古
人與康共談辭致清辨因索琴彈之為廣陵散聲調絕
倫遂以授康誓不傳人亦不言其姓字故康臨終以自
寓云康撰集高士自上古至管寧凡一百一十九人為
之傳贊又作太師箴以明帝王之道復作聲無哀樂論
甚有條理子紹為侍中死蕩陰之難

原注晉書紹字延祖十歲而孤事母

孝謹以父得罪靖居私門山濤領選啟武帝曰康詰有言父子罪不相及嵇紹賢侔郤缺宜加旌命起家為祕

書丞累遷侍中王師敗績于蕩陰百官侍衛莫不散潰
惟紹端冕以身捍衛遂被害於帝側血濺御服帝深哀
嘆之左右欲浣衣帝曰
此嵇侍中血勿浣也

向秀字子期河內懷人也清悟有遠識少為山濤所知
雅好老莊著莊周書隱解發明宗趣振起虛玄惠帝世
郭象又述而廣之儒術之迹熄而道家之言盛矣始秀
欲注莊嵇康曰此書詎復須注正是妨人作樂爾及成
示康曰殊復勝不又與康論養生辭難往復蓋欲發康
高致也康善鍛秀為之佐相對欣然傍若無人又與呂

安灌園於山陽康既被誅秀應本郡計入雒司馬昭問
曰聞有箕山之志何以在此秀曰巢許狷介之士未達
堯心豈足多慕昭甚悅秀乃作思舊賦云余與嵇康呂
安居止接近其人並有末羈之才稽意遠而疏呂心曠而
放其後並以事見法嵇博綜伎藝於絲竹特妙臨當就
命顧視日影索琴而彈之逝將西邁經其舊廬于時日
薄虞泉寒冰淒然隣人有吹笛者發聲寥亮追想曩昔
游宴之好感音而嘆故作賦曰將命適於遠京今遂旋

反而北徂濟黃河以泛舟兮經山陽之舊居瞻曠野之
蕭條兮息余駕乎城隅踐二子之遺跡兮歷窮巷之空
廬歎黍離之愍周兮悲麥秀於殷墟追古昔以懷今兮
心徘徊以躊躇棟宇存而弗毀兮形神逝其焉如昔李
斯之受罪兮嘆黃犬而長吟悼嵇生之永辭兮顧日影
而彈琴託運遇于領會兮寄餘命於寸陰聽鳴笛之慷慨
兮妙聲絕而復尋佇駕言其將邁兮故援翰以寫心後
為散騎侍郎轉黃門侍郎散騎常侍在朝不任職容迹

而已卒於位

郭象者字子玄好老莊能清言太尉王衍深嘆異之曰聽象語如縣河瀉水注而不竭然為人無行初秀著莊子隱解惟秋水至樂二篇未竟而卒秀子幼不復綴緝遷流于世象乃竊秀義以為已注惟自注秋水至樂二篇及易馬蹄一篇其餘或點定文句而已其後秀義別本出而不行至今惟行象注云

謹按晉書作故今有向郭二莊

孫登字公和汲郡共人也無家屬於郡北山為土窟居

之夏則編草為裳冬則被髮自覆好讀易撫一絃琴見者皆親樂之性無恚怒人或投諸水中欲觀其怒既出便大笑時游人間或設衣食一無所受嘗住宜陽山有作炭人見之知非常人與語登亦不應司馬昭聞之使阮籍往觀既見與語亦不應嵇康又從之游三年問其所圖終不答康每嘆息將別謂曰先生竟無言乎登乃曰子識大乎生而有光而不用其光果在於用光人生而有才而不用其才而果在於用才故用光在乎得新所

以保其耀用才在乎識真所以全其年今子才多識寡
難乎免於今之世矣子無求乎康不能用果遭非命乃
作幽憤詩曰昔慙抑下今愧孫登或謂登以魏晉去就
易生嫌疑故為嘿者也竟不知所終

劉伶字伯倫沛國人也貌甚寢放情肆志常以小宇宙
齊萬物為心與阮籍嵇康相遇欣然神解攜手入林不
以生產介意常乘鹿車携一壺酒使人荷鍤隨之謂死
便埋我嘗渴甚求酒於其妻妻捐酒毀器涕泣諫曰君

酒太過非攝生之道伶曰吾不能自禁惟當祝鬼神自
誓爾便可具酒肉妻從之伶跪祝曰天生劉伶以酒為
名一飲一斛五斗解醒婦兒之言慎不可聽乃引酒御
肉隗然復醉與俗人相忤其人攘袂奮拳而往伶徐曰
雞肋不足以當尊拳其人笑而止伶雖陶兀昏放而機
應不差未嘗厝意文翰惟著酒德頌一篇其辭曰有大
人先生以天地為一朝萬期為須臾日月為扃牖八荒
為庭衢行無轍迹居無室廬幙天席地縱意所如止則

搯卮執觚動則挈榼提壺惟酒是務焉知其餘有貴介

公子搢紳處士聞吾風聲議其所以乃奮袂攘襟怒目

切齒陳說禮法是非鋒起

案毛本晉書作蜂起注一作鋒

先生於是方

捧甕承槽銜盃漱醪奮髯箕踞枕麴藉糟無思無慮其

樂陶陶兀然而醉恍爾而醒靜聽不聞雷霆之聲熟視

不見泰山之形不覺寒暑之切肌膚欲之感情俯觀萬

物擾擾焉如江漢之載浮萍二豪侍側焉如蜾蠃之與

螟蛉嘗為建威參軍泰始初對策盛言無為之化時輩

四

色不變無以命之彼何人者
邪孔子曰彼遊方之外者也

嵇康諸人皆以逸才不能

好遯遂為狂人老莊之術誤之也司馬氏父子方放弑
攘竊踵武操不厭然自以為舜禹康乃非薄湯武謂皆
以臣弑君揭觸所忌其能免乎著論養生而卒殺身豈
知養生之道哉太上養心其次養生喪心病狂身死久
矣又奚養生為公和風度邁往高出物表重閉不泄古
之避世之士也至於被髮穴處草衣木食絕去倫類委
棄世教雖自同無懷之民亦接輿之狂也歟

欽定四庫全書

續後漢書卷七十三上下

元 郝經 撰

列傳第七十上下

狂士

阮籍

從子修

阮咸

子瞻孚

阮籍字嗣宗丞相掾瑤之子也籍容貌瓌傑辭藻艷逸志氣宏放傲然獨得或閉戶視書累月不出或登臨山水經日忘歸博覽羣籍尤好老莊嗜酒善嘯能鼓琴當

其得意忽忘形骸時人謂之癡惟族兄文業每歎異之
以為勝已籍嘗隨叔父至東都兗州刺史王昶請與相
見終日不交一言太尉蔣濟聞其有雋才而辟之籍詣
都亭奏記曰伏惟明公以含一之德據上台之位英豪
翹首俊賢抗足開府之日人人自以為掾屬辟書始下
而下走為首昔子夏在於西河之上而文侯擁篲鄒子處
黍谷之陰而昭王陪乘原注劉向別錄鄒衍在燕有谷地美而寒不生五穀鄒子居之
吹律而溫至黍生今名黍谷方士傳言鄒子在燕其遊諸侯畏之皆郊迎而擁篲夫布衣韋帶

之士孤居特立王公大人所以禮下之者為道存也今籍無鄒卜之道而有其陋猥見採擇無以稱當方將耕於東臯之陽輸黍稷之餘稅負薪疲病足力不彊補吏之召非所克堪乞迴謬恩以光清舉初濟恐籍不至得記欣然遣卒迎之而籍已去濟大怒於是鄉親共喻之乃就吏後謝病歸復為尚書郎未幾而又以病免及曹爽輔政召為叅軍籍以疾辭屏居田里歲餘爽誅司馬懿以為從事中郎懿卒司馬師復引為大司馬從事中

即曹髦立封關內侯轉散騎常侍籍本有濟世志屬魏
晉之際天下多故名士少得全者由是不與世事常為
酣飲司馬昭欲為武帝求婚於籍籍醉六十日不得言
而止鍾會數以時事問之欲因其可否而致之罪皆以
酣獲免及昭輔政籍從容言於昭曰籍平生曾遊東平
樂其風土昭大悅即拜東平相籍乘驢到郡壞府舍屏
障使內外相望法令清簡旬日而還昭引為大將軍從
事中即有司言有子殺母者籍曰嘻殺父乃可至殺母

乎坐者怪其失言昭曰殺父天下之極惡而以為可乎
籍曰禽獸知母而不知父殺父禽獸之類也殺母禽獸
之不若衆乃悅服籍聞步兵厨營人善釀有貯酒三百
斛乃求為步軍校尉遺落世事雖去佐職恒遊府內朝
宴必與焉會昭讓九錫公卿將勸進使籍為其辭籍沉
醉忘作臨詣府使取之見籍方據桹醉眠使者以告籍
便書按使寫之無所改竄辭甚清壯為時所重籍雖不
拘禮教然發言玄遠不臧否人物性至孝母終正與人

圍碁對者求止籍留與決既而飲酒二斗舉聲一號吐血數升及將葬食一蒸肫飲酒二斗然後臨訣直言窮矣舉聲一號又吐血數升毀瘠骨立殆致滅性裴楷往弔之籍散髮箕踞醉而直視楷弔唁畢便去或問楷凡弔者主哭客乃為禮籍既不哭君何為哭楷曰阮籍既方外之士故不崇禮典我俗中之士故以軌儀自居各得其志爾

原注晉書虞預雅好經史憎嫉立虛謂阮籍裸袒比之伊川被髮

籍能為青

白眼見禮俗之士以白眼對之及嵇喜來弔籍作白眼

喜不懌而退喜弟康聞之齋酒挾琴造焉籍大悅乃見青眼由是禮法之士疾之若讎司隸校尉何曾面質籍於司馬昭坐曰卿縱情背禮敗俗之人今忠賢執政綜核名實若卿之曹不可長也因謂昭曰公方以孝治天下而聽阮籍以重哀飲酒食肉於公座何以訓人宜擯之四裔無令污染華夏昭愛籍才常擁護之籍嫂嘗歸寧籍相見與別或譏之籍曰禮豈為我設邪鄰家少婦有美色當鑪酤酒常詣婦飲酒醉便卧其側籍既不自

嫌其夫察之亦不疑也兵家女有才色未嫁而死籍不識其父兄徑往哭之盡哀而還時率意獨駕不由徑路車迹所窮輒慟哭而反嘗登廣武觀漢楚戰處嘆曰時無英雄使豎子成名登虎牢山望京邑而嘆於是賦豪傑詩又著達莊論叙無為之貴籍嘗於蘇門山遇孫登與商略終古及棲神導氣之術登皆不應籍長嘯而退至半嶺間聞有聲若鸞鳳之音響乎巖谷乃登之嘯也遂歸又著大人先生傳其略曰世之所謂君子惟法是

脩惟禮是克手執圭璧足履繩墨行欲為目前檢言欲
為無窮則少稱鄉黨長聞隣國上欲圖三公下不失九
州牧獨不見羣蟲之處禪中逃乎深縫匿乎壞絮自以
為吉宅也行不敢離縫際動不敢出視襠自以為得繩
墨也然炎丘火流焦邑滅都羣蟲處於禪中而不能出
也君子之處域內何異於蟲之處禪中乎籍能屬文初
不留思作詠懷詩八十餘首為世所重宋顏延之齊沈
約皆為之註以為魏晉雜唱今存者十有七篇其詩曰

夜中不能寐起坐彈鳴琴薄帷鑑明月清風吹我衿孤鴻號外野朔鳥鳴北林徘徊將何見憂思獨傷心二妃

游江濱逍遙順風翔交甫遺珮環

原注列仙傳江妃二女珮兩明珠大如卵

游江漢之湄逢鄭交甫說之不知其神也曰願請子婉之珮二女解與交甫去數十步忽然不見珮亦失之婉

變有芬芳猗靡情歡愛千載不相忘傾城迷下蔡容好

結中腸感激生憂思諛草樹蘭房膏沐為誰施其雨怨

朝陽如何金石交一旦更離傷嘉樹下成蹊東園桃與

李秋風吹飛藿零落從此始繁華有憔悴堂上生荆杞

驅馬舍之去去上西山趾一身不自保何況戀妻子凝

霜被野草歲暮亦云已昔日繁華子安陵與龍陽

原注說苑

安陵君纏得寵於楚恭王江乙謂纏曰吾聞以財事人者財盡則交絕以色事人者華落則愛衰子安得長被幸乎會王出獵江渚有火若雲蛇咒從南方來正觸王驂善射者射之咒死於車下王謂纏曰萬歲後子將誰與樂纏泣下沾衣曰大王萬歲之後臣將殉恭王乃封纏車下三百戶故江乙善謀安陵善知龍陽君釣十餘魚而棄因泣下王曰有所不安乎對曰無王曰然則何為涕出對曰臣始得魚甚喜後得益多而又欲棄前之所得也今以臣克惡而得拂枕席令爵至人君走人於庭避人於塗四海之內其美人甚多矣聞臣之得幸於王畢褰裳而赴王臣亦曩之所得魚也亦將棄矣安得無涕出乎王乃布令敢言美人者族天天挑

李花灼灼有輝光
悅懌若九春
磬折似秋霜
流盼發姿媚
交笑吐芬芳
携手等歡愛
宿昔同衣裳
願為雙飛鳥
比翼共翱翔
丹青著明誓
永世不相忘
天馬出西北
由來從東道
春秋非有託
富貴焉常保
清露被皐蘭
凝霜霑野草
朝為媚少年
夕暮成醜老
自非王子晉
誰能常美好
登高臨四野
北望青山阿
松柏翳岡岑
飛鳥鳴相過
感慨懷辛酸
怨毒常苦多
李公悲東門
蘇子狹三河
求仁自得仁
豈復嘆咨嗟
開秋兆涼氣
蟋蟀鳴牀幃
感

物懷殷憂悄悄令心悲多言焉所告繁辭將訴誰微風
吹羅袂明月耀清輝晨雞唱高樹命駕起旋歸平生少
年時輕薄好絃歌西遊咸陽中趙李相經過娛樂未終
極白日忽蹉跎驅馬復來歸反顧望三河黃金百鎰盡
資用常苦多北臨太行道失路將如何昔聞東陵瓜近
在青門外連軫距阡陌子母相鉤帶五色耀朝日嘉賓
四面會膏火自煎熬多財為患害布衣可終身寵祿豈
足賴步出上東門北望首陽岑下有采薇士上有嘉樹

林良辰在何許凝霜霑衣襟寒風振山岡玄雲起重陰
鳴鴈飛南征鷓鴣發哀音素質游商聲悽愴傷我心昔
年十四五志尚好書詩被褐懷珠玉顏閔相與期開軒
臨四野登高望所思丘墓蔽山岡萬代同一時千秋萬
歲後榮名安所之乃悟羨門子噉噉今自蚩徘徊蓬池
上還顧望大梁綠水揚洪波曠野奔茫茫走獸交橫馳
飛鳥相隨翔是時鷓鴣火中日月正相望朔風厲嚴寒陰
氣下微霜羈旅無疇匹俛仰懷哀傷小人計其功君子

道其常豈惜終憔悴詠言著斯章炎暑惟茲夏三旬將欲
移芳樹垂綠葉青雲自逶迤四時更代謝日月遞差池徘徊
空堂上怵怛莫我知願覩卒歡好不見悲別離灼灼西
墮日餘光照我衣迴風吹四壁寒鳥相因依周周尚銜羽

蛩蛩亦念饑

原注韓子鳥有周周者首重而屈尾將欲飲於河則必顛乃銜羽而飲今人之所有飲不

足者不可以不索其羽矣爾雅西北有比肩獸焉與叩叩岨虛比為叩叩岨虛齧甘草即有難叩叩岨虛負而走

其名謂之屨

如何當路子磬折望所歸豈為誇譽名憔悴使心

悲寧與雀燕翔不隨黃鵠飛黃鵠游四海中路將安歸獨

坐空堂上誰可與歡者出門臨永路不見行車馬登高望
九州悠悠分曠野孤鳥西北飛離獸東南下日暮思親友
晤言用自寫北里多奇舞濮上有微音輕薄閒游子俯仰
乍浮沉捷徑從狹路僂僂趨荒淫焉見王子喬乘雲翔鄧
林獨有延年術可以慰我心湛湛長江水上有楓樹林皋蘭
被徑路青驪逝駸駸遠望令人悲春氣感我心三楚多秀士
朝雲進荒淫朱華振芬芳高蔡相追尋一為黃雀哀涕下

誰能禁

原注戰國策莊辛諫楚王曰郢必危矣王獨不見黃雀
俯啄白粒仰棲茂樹鼓翅奮翼自以為與人無爭不知

夫公子王孫左挾彈右攝九以其頸為的晝游茂樹夕
調酸醢黃雀其小者也蔡聖侯因是已南游高陂北陟
巫山飲茹溪之流食湘波之魚左視幼妾右擁嬖女與
之馳騁乎高蔡之中而不以國家為事不知夫子發受
命于宣繫已以朱絲而見之也蔡聖侯之事其小者也君王
因是已左州侯右夏侯輦從鄢陵君與壽陵君飯封祿之粟
載方府之金與之馳乎雲夢之中而不以天下國家為
事不知夫穰侯方謀受命乎秦王填澠池之塞內投已
澠池塞之外襄王聞顏色變四體戰慄
於是乃以執珪授之封以為陽陵君

景元四年卒年

五十四歲子渾字長成有父風少慕通達不飾小節籍
謂之曰仲容已豫吾流汝不得復爾太康中為太子庶
子卒從子修字宣子好易老善清言嘗有論鬼神有無

者皆以人死者有鬼修獨以為無曰今見鬼者云著生時衣服若人死有鬼衣服有鬼邪論者服焉後伐社樹或止之修曰若社而為樹伐樹則社移樹而為社伐樹則社亡矣性簡任不修人事絕不喜見俗人遇便舍去意有所思率爾牽裳不避晨夕至或無言但欣然相對常以百錢掛杖頭至酒家便獨酣暢雖當世富貴而皆不顧家無儋石不以為慮王衍當時談宗自以論易略盡然有所未了終莫能悟每云不知比沒當見能通之

者不衍族子敦謂衍曰阮宣子可與言衍曰吾亦聞之
但未知定何如爾及與修談言寡而旨暢衍乃嘆服梁
國張偉志趣不常自隱於屠釣修愛其才而知其不真
偉後為黃門郎陳留內史果以偽敗修年四十餘未有
室家王敦與諸名士斂錢為婚慕之者求入錢不得敦
時為鴻臚卿謂修曰卿嘗無食鴻臚丞差有祿能作否
修曰亦復可爾耳遂為之轉太傅行參軍太子洗馬避亂
南行至西陽期思縣為賊所害年四十二

欽定四庫全書

續後漢書
卷七十三上下

十

議曰蘇武李陵初為古詩高簡雅質為西漢正體建安
中七子作而詞氣盛逮夫潘陸益尚才華古意始衰矣
惟東漢之十九首與阮籍之詠懷十七首託物寓興辭
旨幽婉曠逸邁往如醉語無叙吐出真實高風遠韻邈

不可及其後陶潛出於應璩

原注元好問詩文自警初學記貧門載應璩雜詩貧

子語富兒無錢可把撮耕日不得粟采彼南山葛簞瓢恒自在無用相呵喝文苑英華載璩三叟詞云昔有行路人陌上見三叟年各百餘歲相對鉏禾莠駐車問三叟何以得此壽一叟前致詞量腹節所受中叟前致詞夜卧不覆首下叟前致詞室內婦簾醜要哉三叟言所以能長久鍾嶸詩評謂淵明詩其源出於應璩然璩詩

世不多見宋人以據百一詩較之謂淵明與據全無關涉殆未見前二詩邪大率前輩議論悉有依據譏評之際不可不慎也

靜深簡麗委運乘化悠然天地同流與籍作相

表裏於是為魏晉古詩之正歷齊梁南北隋唐至陳子昂之感遇

原注三首

李白之古風

原注五首

杜甫之諸詠懷

懷古韓愈之秋懷

原注十一首

柳宗元韋應物蘇軾黃庭堅

之諸五言雜體及朱熹之齋居感興

原注二首

與近世元

好問之萬化如大路等其風格氣骨皆本於籍據潛鳴呼籍雖狂而其中蘊蓄者如是乃為詩家規矩大匠亦

人豪也哉

阮咸字仲容父熙武都太守咸任達不拘與叔籍為竹林之遊咸與籍居道南諸阮居道北北阮富而南阮貧七月七日北阮盛曬衣服皆錦綺粲目咸以竿挂大布犢鼻於庭人或怪之答曰未能免俗聊復爾耳仕為散騎侍郎山濤舉咸典選曰阮咸貞素寡欲深識清濁萬物不能移若在官人之職必絕於時武帝以咸耽酒虛浮遂不用太原郭奕高爽有識量知名於時少所推先

見咸心醉不覺嘆服咸居母喪縱情越禮素幸姑婢姑
當歸夫家初云留婢既而從去時方有客咸聞之遽偕
客馬追婢既及與婢累騎而還曾無愧容咸少解音律
善彈琵琶雖處世不交人事惟與親知絃歌酣宴特善
從子脩每以得意為歡諸阮皆飲酒咸至共集不復用
杯觴以大盆盛酒圓坐相向大酌更飲時羣豕來飲其
酒咸直接去其上便共飲之羣從昆弟莫不以放達為
行荀勗每與咸論音律自以為不及也疾之出補始平

太守卒二子瞻孚瞻字千里清虛寡欲讀書不甚研求而默識其要與人談辨辭不足而旨有餘善鼓琴人往求聽不問貴賤長幼皆為彈之神氣沖和而不知向人所在外兄潘岳每令鼓琴終日達夜無忤色由是莫不嘆其恬憺不可榮辱矣司徒王戎嘗問瞻曰聖人貴名教老莊明自然其旨同異瞻曰將無同戎咨嗟良久即命辟之時人謂之三語掾太尉王衍亦雅重之瞻常羣行冒熱渴甚逆旅有井衆人競趨之瞻獨逡巡在後須

飲者畢乃進東海王越鎮許昌以瞻為記室參軍

原注晉書

瞻與王承謝鯤鄧攸俱在越府越與瞻等書曰禮年八歲出就外傳明始可以加師訓之則十年曰幼學明可漸進先生之教也然學之所入淺體之所安深是以閑習禮容不如式瞻儀度諷誦遺言不若親承音旨小兒毗既無令淑之質不聞道德之風望諸君時以閑豫周旋誨接永嘉中為太子舍人瞻

素執無鬼論物莫能難每自謂此理足以辨正幽明忽有一客通名詣瞻寒溫畢與談名理客甚有才辨良久及鬼神之事反覆甚苦客遂屈乃作色曰鬼神古今聖賢所共傳君何獨得言無僕即鬼也於是變為異形須

史消滅瞻默然意色大惡後歲餘病卒年三十孚字遥集其母即姑婢也孚始生其姑取王延壽魯靈光殿賦曰胡人遥集於上楹而以字焉初辟太傅府遷騎兵屬避亂南渡元帝以為安東參軍蓬髮飲酒不以國務嬰心時帝既用申韓以救世而孚輩未能改故不以事任處之轉丞相從事中郎終日酣縱恒為有司所按帝每優容之琅邪王裒為車騎將軍鎮廣陵高選綱佐以孚為長史帝謂曰卿既統軍府郊壘多事宜節飲也對曰

陛下不以臣不才委之以戎旅之重臣僂俛從事不敢有
言者竊以今王莅鎮威風赫然皇澤遐被賊寇斂迹氛
侵既澄日月自朗臣何可爝火不息正應端拱嘯詠以
樂常年爾遷黃門侍郎散騎常侍嘗以金貂換酒復為
所司彈劾帝宥之轉太子庶子左衛率領屯騎校尉明
帝即位遷侍中從平王敦賜爵南安縣侯轉吏部尚書
領東海王師稱疾不拜詔就家用之尚書令郗鑒以為
非禮帝曰就用之誠不快不爾便廢才矣時卞壺當官

勤恪而孚以曠達自高每謂壺曰卿恒無閑泰常如銜
瓦石不亦勞乎壺曰諸君以道德恢宏風流相尚執鄙
吝者非壺而誰於是貴遊子弟多慕孚及王澄謝鯤之
徒為達壺正色於朝曰悖禮傷教罪莫斯甚中朝傾覆
實此之由欲推奏之王導庾亮不從乃止聞者莫不折
節而孚自若也及帝疾大漸溫嶠入受顧命過孚要與
同行升車乃告之曰主上遂大漸江左危弱實資羣賢
共康世務卿時望所歸今欲屈卿同受顧託孚不答固

求下車嶠不許垂至臺門告嶠內迫求暫下便徒走還

家

原注晉書初祖約性好財孚性好履同為累而未判其得失有詣約見正料財物客至不能盡屏餘兩小

麓傾身障之意未能平或有詣孚正見孚蠟履且嘆曰未知一生當着幾量履神色甚閒暢於是勝負始分

咸和初拜丹陽尹時太后臨朝政出舅族孚謂所親曰

今江東雖累世而年數實淺主幼時艱運終百六而庾

亮年少德信未孚以吾觀之將兆亂矣會廣州刺史劉

顗卒遂苦求出王導等以孚疎放非京尹才乃除都督

交廣寧三州軍事鎮南將軍領平越中郎將廣州刺史

假節未至鎮卒年四十九無何蘇峻作逆識者以孚為
知機無子從孫廣嗣

議曰夫有無不足以論道正始以來崇尚老莊凡物一
歸於無任適放散闡然以為樂故脩既為無鬼之說而
瞻遂為無鬼之論為客所苦失意而死則心魄之所未
安而致之也鬼神者道之妙用聖人罕言惟於易大傳
言其情狀曰精氣為物游魂為變陰陽不測而妙萬物
最為深切著明陽之動而信聚而為精則神之所為也

陰之反而歸變而之化則鬼之所為也屈信於天地人物之間而不滯於天地人物者也為陰陽造化而不滯於陰陽造化者也建立無窮天地萬物消沉無窮天地萬物具迹遍天下而卒莫見其迹其功蓋天下而不自以為功故能為天地無窮之覆載日月無窮之照臨寒暑無窮之變化風雷無窮之震盪雨露無窮之膏潤水火無窮之燥濕峙山嶽流川瀆徵聲色蘊臭味以為天地無窮之用其在於人一慮之起神之為也一慮之滅

鬼之為也一呼之來神之為也一吸之往鬼之為也一生之長神之為也一死之消鬼之為也至於疾痛疴癢喜怒哀樂作息語默不疾而速不行而至皆其所為於是為男女夫婦無窮之別父子兄弟無窮之親君臣上下無窮之分仁義禮智無窮之理禮樂刑政無窮之法治亂得失無窮之業古今存亡無窮之迹權運世操倚伏制興衰柄成壞機榮辱統是非辯邪正以為斯人無窮之用故鬼神者三才之機要幽明之橐籥名教之紀

綱也豈可謂為無鬼乎夫道體藏於靜陰鬼反為神之
質神則無方而鬼則有體若瞻者一狂生爾烏足以語
是哉孔子謂子路未知人焉知鬼子路聖門高弟且猶
不知瞻又豈能知哉惟其不知遂謂之無爾且世俗之
謂鬼者人死而精魄不化有聲而無形爾修瞻諸狂方
放心遺形雖其身之生亦以為贅又況其死者乎故斷
然謂之無也精變而為神魄化而為鬼理之常也氣盛
而彊死精爽則不化理之變也故有馮物為聲儼形為

影之鬼焉斷木之餘蒸而為菌戰陣之血雨而為燐有時而然不可以為常也故謂之無鬼不知鬼者也謂人之死皆為鬼不知人者也

欽定四庫全書

續後漢書卷七十三下上

元 郝經 撰

列傳第七十下上

狂士

王戎

從弟衍
衍弟澄

王戎字濬冲琅邪臨沂人也祖雄幽州刺史父渾涼州

刺史貞陵亭侯

原注裴松之曰案王氏譜雄字元伯太
保祥之宗也魏名臣奏議載安定太

守孟達薦雄曰臣聞明君以求賢為業忠臣以進善為
效故易稱拔茅連茹傳曰舉爾所知臣不自量竊慕其

欽定四庫全書

附錄漢書
卷七十三下上

義臣昔以人乏謬充備部職時涿郡太守王雄為西部從事與臣同僚雄天性良固果而有謀歷試三縣政成人和及在近職奉宣威恩懷柔有術清慎持法臣往年出使經過雄郡自說受陛下拔擢之恩常勵節精心奉恩投命為效言辭激揚情趣款惻臣雖愚闇不識真偽以謂雄才兼資文武忠烈之性踰越倫輩今涿郡領戶三千孤寡之家參居其半北有守兵藩衛之固誠不足舒雄智力展其勤幹也臣受恩深厚無以報國不勝懷悽淺見之情謹冒陳聞詔曰昔蕭何薦韓信鄧禹進吳漢惟賢知賢也雄有膽智技能文武之姿吾宿知之今便以參散騎之選方使少在吾門下知指歸便大用之矣天下之士欲使皆先歷散騎然後出據州郡是吾本也遂遷散騎常侍後為幽州刺史子渾涼州刺史次又平北將軍司徒安豐侯戎渾之子太尉武陵侯衍荊州刺史澄皆

父史澄皆

戎幼穎悟神彩秀徹視日不眩裴楷見而目

之曰戎眼爛爛如巖下電

原注晉書戎年六七歲於宣武場觀戲猛獸在檻中虺吼

震地衆皆奔走戎獨立不動神色自若魏明帝於閣上見而奇之又嘗與羣兒戲於道側見李樹多實競趣之戎獨不往或問其故戎曰樹在道遠而多子必苦李也取之信然

阮籍與渾為友戎少

籍二十歲而籍與之交籍每適渾俄頃輒去過視戎良

久乃出謂渾曰濬冲清賞非卿倫也與卿言不如與阿

戎談及渾卒於涼州故吏賻贈數百萬戎辭不受由是

顯名為人短小任率不脩威儀善發談端賞其要會

原注

晉書朝賢嘗上巳禊洛或問王濟曰昨遊有何勝談濟曰張華善說史漢裴頠論前言往行衮衮可聽王戎談

欽定四庫全書

續後漢書
卷七十三下上

二

子房季札之間超然玄著其為識鑒所賞如此戎嘗與阮籍飲兗州刺史劉昶在坐籍以酒少酌不及昶昶無恨色戎異之他日問籍曰彼何如人也答曰勝公榮不可不與飲若減公榮則不敢不共飲惟公榮可不與飲公榮昶字也與阮籍為竹林之遊戎嘗後至籍曰俗物已復

來敗人意戎笑曰卿輩意亦復易敗爾鍾會伐漢與戎別問計戎曰道家有言為而不時非成功難保之難也及會敗以戎為知言襲父爵辟相國掾晉武篡代歷吏部黃門郎散騎常侍河東太守荊州刺史坐遣吏脩園宅應免官詔以贖論遷豫州刺史加建威將軍詔率所

部伐吳戎遣參軍羅尚劉喬領前鋒進攻武昌吳將楊
雍孫述江夏太守劉朗各率衆詣戎降戎督大軍臨江
吳牙門將孟泰以蘄春邾二縣降吳平進爵安豐縣侯
增邑六千戶賜絹六千疋戎渡江綏慰新附宣揚威惠
吳光祿勳石偉方直不容皓朝稱疾歸家戎嘉其清節
表薦之詔拜偉為議郎以二千石祿終其身荆土悅服
徵為侍中南郡太守劉肇賂戎筒中細布五十端為司
隸所糾以知而未納故得不坐帝謂朝臣曰戎豈懷私

苟得者正當不欲為異爾帝雖有是言然大貶於清議
後遷光祿勳吏部尚書以母憂去職性至孝不拘禮制
飲酒食肉或見奕碁而容貌毀瘁殆不能起裴頠往弔
之謂人曰若使一慟能傷人濬冲不免滅性之譏也時
和嶠亦居父喪以禮法自持量米而食哀毀不踰於戎
帝謂劉毅曰和嶠毀頓過禮使人憂之毅曰嶠雖寢苦
食粥乃生孝爾至於王戎所謂死孝陛下當先憂之戎
先有吐疾居喪增甚帝遣醫療之并賜藥物又斷賓客

揚駿輔政拜太子太傅駿誅東安公繇專斷刑賞威震
外內戎戒繇曰大事之後宜深遠之繇不從果得罪轉
中書令加光祿大夫給恩信五十人遷尚書左僕射領
吏部戎始為甲午制凡選舉皆先治民然後授用司隸
傅咸奏戎曰書稱三載考績三考黜陟幽明今內外羣
官居職未暮而戎奏還既未定其優劣且送故迎新相
望道路巧詐由生傷農害政戎不仰依堯舜典謨而驅
動浮華虧敗風俗非徒無益乃有大損宜免戎官以敦

風俗戎與賈郭通親竟得不坐尋轉司徒苟媚取容慙懷太子之廢竟無一言匡諫裴頠戎之壻也頠誅戎坐免官齊王冏起義孫秀錄戎於城內趙王倫世子欲取戎為尚書令倫誅得釋而河間王顥遣使說成都王穎舉兵誅齊王冏檄至冏謂戎曰孫秀作逆天子幽逼孤糾合義兵掃除元惡臣子之節信著神明二王聽讒構造大難當賴忠謀以濟不協戎曰公首舉義衆匡定大業開闢以來未始有也然論功報賞不及有勞朝野失

望人懷二志今二王帶甲百萬其鋒不可當若以王就第不失故爵委權崇讓此求安之策也同黨葛旗怒曰漢魏以來王公就第寧有得保妻子乎戎可斬羣僚震悚戎偽葯發墮廁得免以王室方亂規依回避禍不為蹇諤及典銓選未嘗進寒素退虛偽但戶調門選而已尋拜司徒雖位鼎司而委事寮屬閒乘小馬從便門出遊見者不知其三公也故吏多至大官道路相遇輒避之性好利置園田水碓周徧天下積聚錢貨不知紀極每

自執牙籌晝夜計算恒若不及而儉嗇不自奉養人目
為贅虜其女適裴頴貸錢數萬久而不還及來歸寧戎
色不悅女遽還之從子將婚戎遺其一單衣婚訖而便
責取家有好李常出貨之恐人得種乃鑽其核其鄙吝
如此車駕西遷戎出奔郊野在危難間方接鋒刃談笑
自若召親賓歡宴竟日永興二年卒於邾縣年七十二
謚曰元戎有人倫風鑒常目山濤如璞玉渾金皆欽其
寶莫知名其器王衍神姿高徹如瑤林瓊樹自然是風

塵表物謂顧拙於用長荀勗工於用短陳道寧謬謬

謹案

晉書作綬綬注一本作纓纓

如東長竿族弟敦有高名戎惡之敦每

候戎輒託疾不見敦後果為逆嘗經黃公酒壚下顧謂
後車客曰吾昔與嵇叔夜阮嗣宗酣暢於此竹林之遊
亦豫其末自嵇阮云亡吾便為時所羈縻今日視之雖
近邈若山河初孫秀為琅邪郡吏求品於鄉議戎從弟
衍將不許戎勸品之及秀得志朝士有宿怨者皆被誅
而戎衍獨得免子萬有美名少而大肥戎令食糠而肥

愈甚年十九卒有庶子興戎所不齒以從弟陽平太守
愔子為嗣及元帝渡江戎諸宗族益盛澄導綏敦玄皆
為將相及太保祥太尉行并戎號琅邪八王云王衍字
夷甫神情明秀風姿詳雅總角嘗造山濤濤嗟嘆良久
既去目送之曰何物老嫗生寧馨兒然誤天下蒼生者
未必非此人也父又為平北將軍常有公事使行人列
上不時報衍年十四在京師造僕射羊祜申陳事狀辭
甚清辯祜不以為然而衍無屈下之色祜曰敗俗傷化

必此人也楊駿欲以女妻衍衍耻之遂佯狂自免武帝
聞其名問戎曰夷甫當世誰比戎曰未見其比當從古
人中求爾泰始八年詔舉奇才可以安邊者衍初好論
從橫之術故尚書盧欽舉為遼東太守不就於是絕口

不論世事惟雅詠玄虛而已

原注晉書衍嘗因宴集為族人所怒舉標擲其面衍

初無言引王導共載而去然心不能平在車中攬鏡自照謂導曰爾看吾目光乃在牛背上矣父卒於

北平送故甚厚為親識所借貸因捨之數年之間家資
罄盡出就雒城西田園而居後為太子舍人遷尚書郎

出補元城令終日清談而縣務亦理入為中庶子黃門
侍郎衍既有盛才明悟若神常自比子貢妙于玄言惟
談老莊聲名籍甚傾動當世每捉玉柄麈尾與手同色
義理有所不安隨即改更世號口中雌黃朝野翕然謂
之一世龍門後進之士莫不景慕選舉登朝皆以為稱

首矜高浮誕遂成風俗

原注晉書衍嘗喪幼子山簡弔之衍悲不自勝簡曰孩抱中物

何至於此衍曰聖人忘情最下不及於情然則情之所鍾正在我輩簡服其言更為之慟衍妻郭氏賈后之姻也藉中宮之勢剛愎貪戾聚斂無厭好干預人事衍患之而不能禁時有鄉人幽州刺史李陽京師大俠也郭

氏素憚之衍謂郭曰非但我言卿不可李陽亦謂不可郭氏為之小損衍疾郭之貪鄙故口未嘗言錢郭欲試之令婢以錢統牀使不得行衍晨起見錢謂婢曰舉阿堵物却其措意如此後歷北軍中候

中領軍尚書令女為愍懷太子妃太子為賈后所誣衍懼禍自表離婚賈后既廢有司奏衍曰衍與司徒梁王彤書寫呈皇太子手與妃及衍書陳見誣之狀彤等伏讀辭旨懇惻衍備位大臣應以義責太子被誣得罪衍不能守死即求離婚得太子手書隱蔽不出志在苟免無忠蹇之操宜加顯責以厲臣節可禁錮終身從之衍

素輕趙王倫及倫篡位陽狂斫婢以自免倫誅拜河南
尹轉尚書又為中書令齊王冏有匡復功專權自恣公
卿皆為之拜衍獨長揖焉以病去官成都王穎以衍為
中軍師累遷尚書僕射領吏部後拜尚書令司空司徒
衍雖居宰輔之重不以經國為念而思自全之計說東
海王越曰中國已亂當賴方伯宜得文武兼資以任之
乃以弟澄為荊州族弟敦為青州因謂澄敦曰荊州有
江漢之固青州有負海之險卿二人在外而吾留此足

以爲三窟矣及石勒王彌寇京師以衍都督征討諸軍
事持節假黃鉞以距之衍使前將軍曹武左衛將軍王
景擊勒等敗之獲其輜重遷太尉尚書令如故封武陵
侯辭封不受時雒陽危逼多欲遷都以避其難而衍獨
賣車牛以安衆心越討苟晞衍以太尉爲太傅軍司及
越卒衆共推衍爲元帥衍以賊寇蜂起懼不敢當曰今
日之事安可以非才處之俄而爲石勒所破勒呼王公
與之相見問衍以晉故衍爲陳禍敗之由云計不在已

且少無宦情不豫世事因勸勒稱尊號冀以自免勒怒
曰君少壯登朝名蓋四海身居重任至於白首何得言
無宦情邪破壞天下非君而誰使左右扶出謂其黨孔
萇曰吾行天下多矣未嘗見此輩人當可活不萇曰彼
皆晉之王公必不為我盡力勒曰要不可加以鋒刃夜
使排牆填殺之時年五十六衍將死顧左右言曰吾曹
雖不如古人向若不祖尚浮虛戮力以匡天下猶可不
至今日復誰咎哉王敦過江常稱之曰夷甫處衆中如

珠玉在瓦石間顧愷之作畫贊亦稱衍巖巖清峙壁立
千仞其為人所尚如此子玄字眉子少慕簡曠亦有俊
才與衛玠齊名荀藩以為陳留太守屯尉氏玄素名家
有豪氣荒弊之時人情不附將附祖逖為盜所害初正
始中何晏王弼等祖述老莊立論以為天地萬物皆以
無為為本無也者開物成務無往不存者也陰陽恃以
化生萬物恃以成形賢者恃以成德不肖恃以免身故
無之為用無爵而貴矣於是流俗放蕩不尊儒術阮籍

諸人素有高名競談浮虛蔑棄禮法尸祿耽寵仕不事
事至行而聲譽大盛尤尚清談位高勢重不以物務自
嬰遂相倣效風教陵遲裴頠乃著崇有論以譏行不以

為然攻難交至莫能屈頠

原注晉書裴頠傳崇有論曰夫總混羣本宗極之道也方

以族異庶類之品也形象著分有生之體也化感錯綜
理迹之原也夫品而為族則所稟者偏偏無自足故憑
乎外資是以生而可尋所謂理也理之所體所謂有也
有之所須所謂資也資有攸合所謂宜也擇乎厥宜所
謂情也識智既授雖出處異業黠語殊塗所以實生存
宜其情一也衆理並而無害故貴賤形焉失得由乎所
接故吉凶兆焉是以賢人君子知欲不可絕而交物有
會觀乎往復稽中定務惟夫用天之道分地之利躬其

力任勞而後饗居以仁順守以恭儉率以忠信行以敬讓志無盈求事無過用乃可濟乎故大建厥極經理羣生訓物垂範於是乎在斯則聖人為政之由也若乃淫抗陵肆則危害萌矣故欲行則速惠情佚則怨博擅恣則興政專利則延寇可謂以厚生而失生者也悠悠之徒駭乎若茲之釁而尋艱爭所緣察夫偏質有弊而覩簡損之善遂闡貴無之議而建賤有之論賤有則必外形外形則必遺制遺制則必忽防忽防則必忘禮禮制弗存則無以為政矣衆之從上猶水之居器也故兆庶之情信於所習習則心服其業業服則謂之理然是以君人必慎所教班其政刑一切之務分宅百姓各授四職能令稟命之者不肅而安忽然忘異莫有遷志况於據在三之尊懷所隆之情敦以為訓者哉斯乃昏明所階不可不審夫盈欲可損而未可絕有也過用可節而未可謂無貴也蓋有講言之具者深列有形之故盛稱空無之美形器之故有徵空無之義難檢辯巧之文可

悅似象之言足惑衆聽眩焉溺其成說雖頗有異此心者
辭不獲濟屈於所狎因謂虛無之理誠不可蓋唱而有
和多往弗反遂薄綜世之務賤功烈之用高浮游之業
卑經實之賢人情所殉篤夫名利於是文者衍其辭訥
者讚其旨染其衆也是以立言藉於虛無謂之玄妙處
官不親所司謂之雅遠奉身散其廉操謂之曠達故砥
礪之風彌以陵遲放者因斯或悖吉凶之禮而忽容止
之表漬棄長幼之序混漫貴賤之級其甚者至於裸裎
言笑忘宜以不惜為弘士行又虧矣老子既著五千之
文表振微雜之獎甄舉靜一之義有以令人釋然自夷
合於易之損謙艮節之旨而靜一守本無虛無之謂也
損艮之屬蓋君子之一道非易之所以為體守本無也
觀老子之書雖博有所經而云有生於無以虛為主偏
立一家之辭豈有以而然哉人之既生以保生為全全
之所階以順感為務若味近以虧業則沉溺之釁興懷
末以忘本則天理之真滅故動之所交存亡之會也夫

有非有於無非無於無非無於有非有是以申縱播之
累而著貴無之文將以絕所非之盈謬存大善之中節
收流遁於既過反澄正於胸懷宜其以無為辭而旨在全
有故其辭曰以為文不足若斯則是所寄之塗一方
之言也若謂至理信以無為宗則偏而害當矣先賢達
識以非所滯示之深論惟班固著難未足折其情孫卿
揚雄大體抑之猶偏有所許而虛無之言日以廣行衆
家扇起各列其說上及造化下被萬事莫不貴無所存
僉同情以衆固乃號凡有之理皆義之卑者薄而鄙焉
辯論人倫及經明之業遂易門肆頗用矍然申其所懷
而攻者盈集或以為一時口言有客幸過咸見命著文
植列虛無不允之徵若未能每事釋正則無家之義弗
可奪也願退而思之雖君子宅情無求於顯及其立言
在乎達旨而已然去聖久遠異同紛糾苟少有彷彿可
以崇濟先典扶明大業有益於時則惟患言之不能焉
得靜默及未舉一隅略示所存而已哉夫至無者無以

能生故始生者自生也自生而必體有則有遺而生虧矣生以有為已分則虛無是有之所謂遺者也故養既化之有非無用之所能全也理既有之衆非無為之所能循也心非事也而制事必由於心然不可以制事以非事謂心為無也匠非器也而制器必須於匠然不可以制器以非器謂匠非有也是以欲收重衆之鱗非偃息之所能獲也隕高壙之禽非靜拱之所能捷也審投弦餌之用非無知之所能覽也由此而觀濟有者皆有也虛無奚益於永嘉末元帝渡江王導為鎮東司馬陳已有之羣生哉

顧遺導書曰中華所以傾弊者正以取才失所先白望而後實事浮競驅馳互相貢薦言重者先顯言輕者後叙遂相波扇乃至陵遲加有莊老之俗傾惑朝廷養望

者為宏雅政事者為俗人王職不卹法物廢墜夫欲制

遠先由近始今宜改張明賞信罰拔卓茂於密縣顯朱

邑於桐鄉然後大業可舉中興可冀爾

原注後漢書卓茂以儒術舉為

侍郎遷密令勞心諄諄視人如子舉善而口無惡言吏人親愛之而不忍欺之光武即位先訪求茂以為太傅

封褒德侯

漢書朱邑為舒桐鄉嗇夫廉平不苛以愛

利為行未嘗笞辱人存問耆老孤寡遇之有恩所部吏

民愛敬焉遷北海太守以治行第一入為大司農神爵

元年卒天子聞惜下詔稱揚曰大司農邑廉潔守節退

食自公亡疆外之交束脩之饋可謂淑人君子遭離

凶災朕甚憫之其賜邑子黃金百斤以奉其祭祀

真

不從由是江左流風益盛永和中桓溫北伐過淮泗踐

北境與諸僚屬登平乘樓眺望中原慨然嘆曰遂使神州陸沈百年丘墟王夷甫諸人不得不任其責袁宏曰運有廢興豈必諸人之過溫作色曰昔劉景升有千斤大牛噉芻豆十倍常牛負重致遠曾不若一羸特魏武入荊州殺以享軍意在宏也坐中皆失色時謝安當國猶尚清談不恤典禮至於期功之喪不廢絲竹嘗與王羲之登冶城悠然遐想有高世志羲之曰夏禹憂勤手足胼胝文王旰食日不暇給今四郊多壘宜思自效而

虛談廢務浮文妨要恐非當今所宜安曰秦任商鞅二世而亡豈清言致患邪王坦之聞之乃作廢莊論以諷

安亦弗悛以及於亡

原注晉書王坦之傳廢莊論曰荀卿稱莊子蔽於天而不知人揚雄

亦曰莊周放蕩而不法何晏云繫莊軀放玄虛而不周乎時變三賢之言遠有當乎夫獨構之唱唱虛而莫和無感之作義偏而用寡動人由於兼忘應物在乎無心孔父非不體遠以體遠故用近顏子豈不具德以德備故膺教胡為其然哉不獲已而然也夫自足者寡故理懸於義農徇教者衆故義申於三代道心惟微人心惟危吹萬不同孰知正是雖首陽之精三黜之智摩頂之甘落毛之愛枯槁之生負石之死格諸中庸未入乎道而況下斯者乎先王知人情之難肆懼違行以致訟悼司徹之貽悔審祗帶之所緣故陶鑄羣生謀之未兆每

攝其契而為節焉使夫敦禮以崇化日用以成俗誠存而邪忘利損而競息成功遂事百姓皆曰我自然蓋善闇者無怪故所遇而無滯執道以離俗孰踰於不達語道而失其為者非其道也辯德而有其位者非其德也言默所未究况揚之以為風乎且即濠以尋魚想彼之我同推顯以求隱理得而情昧若夫莊生者望大庭而撫契仰彌高於不足寄積想於三篇恨我懷之未盡其言諷說其義恢誕君子內應從我游方之外衆人因藉以為弊薄之資然則天下之善人少不善人多莊生之利天下也少害天下也多故曰魯酒薄而邯鄲圍莊生作而風俗頽禮與浮雲俱征偽與利蕩並肆人以克己為取士以無措為通時無履德之譽俗有蹈義之愆驟語賞罰不可以造次屢稱無為不可與適變雖可用於天下不足以用天下昔漢陰丈人脩渾沌之術孔子以為識其一不識其二莊生之道無乃類乎與夫如愚之契何殊間哉若夫利而不害天之道也為而不爭聖之

德也羣方所資而莫知誰氏在儒而非儒非道而有道
彌貫九流玄同彼我萬物用之而不既疊疊日新而不
朽昔吾孔老
固已言之矣
衍弟澄字平子生而警悟雖未能言見人

舉動便識其意行尤重之

原注晉書衍妻郭氏性貪鄙令婢路上擔糞澄年十四諫

郭郭大怒謂澄曰昔夫人臨終以小郎屬新婦不以新婦屬小郎將杖之澄曰安有王夷甫妻尋路拾馬糞者乎遂踰牕而走王敦庾敳為人士目曰阿平第一子嵩第二處

仲第三澄嘗謂衍曰兄形似道而神峰太雋衍曰誠不若卿落落穆穆然也有經澄所目者衍不復有言輒云
已經平子矣累遷成都王穎從事中郎穎嬖豎孟玖譖

殺陸機兄弟天下切齒澄發玖私姦穎乃誅之莫不稱
快及穎敗東海王越請為司空長史以迎大駕勲封南
鄉侯遷建威將軍雍州刺史不之職時王敦謝鯤庾敳
阮脩皆為衍所親善號為四友而亦與澄狎又有光逸
胡毋輔之等亦豫焉酣讌縱誕窮歡極樂惠帝末衍白
越以澄為荊州刺史持節都督領南蠻校尉敦為青州
衍因問以方略敦曰當臨事制變不可豫論澄辭義鋒
出算略無方一坐嗟服澄將之鎮送者傾朝見樹上鵲

巢便脫衣上樹探轂而美之神氣蕭然傍若無人劉琨
謂澄曰卿形雖散朗而內實動俠以此處世難得其死
澄默然不答澄既至鎮日夜縱酒不親庶事雖寇戎急
務亦不經懷擢順陽人郭舒以為別駕委以州府時京
師危逼澄率衆將勤王而飄風折其節柱會王如寇襄
陽澄前鋒至宜城遣使詣山簡為如黨嚴嶷所獲嶷偽
使人從襄陽來而問之曰襄陽拔未答曰昨旦破城已
獲山簡乃陰緩澄使令得亡去澄聞襄陽陷以為信然

遂還既而恥之託糧運不繼委罪長史蔣俊而斬之巴蜀流人散在荆湘者與土人忿爭遂殺縣令屯聚樂鄉澄使成都內史王機討之賊請降澄偽許之既而襲之於寵洲以其妻子為賞沉八千餘人於江中於是益梁流人四五萬家俱反推杜弼為主南破零桂東掠武昌敗王機於巴陵澄亦無懼意但與機日夜縱酒投壺博戲殺富人李才取其家資以賜郭舒南平太守應詹驟諫不聽於是上下離心望實俱損猶傲然自得後率眾

擊杜弢次於作塘山簡參軍王冲叛於豫州自稱荊州
刺史澄懼使杜弢守江陵澄遷於孱陵尋奔沓中郭舒
諫曰使君臨州雖無異政未失衆心今西收華容向義
之兵足以擒此小醜奈何自棄澄不從初澄命武陵諸
郡同討杜弢天門太守扈瓌次於益陽武陵內史武察
爲其郡吏所害瓌以孤軍引還澄怒以杜曾代瓌夷陵
謹案晉書
脫陵字袁遂瓌故吏也託爲瓌報仇遂舉兵逐曾自
稱平晉將軍澄使司馬毋丘邈討之爲遂所敗會元帝

徵為軍諮祭酒於是赴召時王敦為江州鎮豫章澄過
詣敦澄夙有盛名出於敦右士庶莫不傾慕兼勇力絕
人為敦所憚澄猶以舊意侮敦敦益忿怒請澄入宿陰
欲殺之而澄左右二十人持鉄馬鞭為衛澄手嘗捉玉
枕以自防故敦未得發後敦賜澄左右酒皆醉借玉枕
觀之因下牀而謂澄曰何與杜弢通信澄曰事自可驗
敦欲入內澄手引敦衣至於絕帶乃登於梁因罵敦曰
行事如此殃將及矣敦令力士路戎搃殺之時年四十

四載尸還其家劉琨聞澄死歎曰澄自取之及敦平澄故吏佐著作郎桓稚上表理澄請加贈謚詔復澄本官謚曰憲長子詹早卒次子徽右軍司馬

議曰孟子曰人之所以異於禽獸也者幾希庶民去之君子存之存之則人道在所以為人也去之則人道亡雖人而不足以為人矣故君子之存之也始則窮理盡性以至命中則動心忍性以立命終則存心養性以俟命然心為甚所以主乎性而統夫人者也敬慎操持而

不放則常存心存則人道存矣自王何崇尚清談祖述
虛無至二王當國率天下而放心遺形以敢廢禮壞法
削去繩檢者為高於是君臣父子男女夫婦之倫盡亡
仁義道德禮樂刑政之典盡廢堯舜禹湯文武周公孔
子孟軻高光昭烈孔明之脩理維持者委地而不復存
天下遂無人道中國於是乎亡矣嗚呼凡學術之不適
實用祇為高深迂遠而不切者皆殺天下誤後世者也
有國君人者可不辨哉可不慎哉

欽定四庫全書

史部

續後漢書卷七十七
三下下至

詳校官編修臣黃壽齡

編修臣裴謙覆勘

謄錄貢生臣張大同

謄錄監生臣俞錫玉

欽定四庫全書

續後漢書卷七十三下

元 郝經 撰

列傳第七十下

狂士

樂廣

謝鯤

胡毋輔之

子謙之

畢卓

光逸

衛玠

王濟

樂廣字彥輔南陽滎陽人也父方參征西將軍夏侯玄

軍事廣時年八歲玄嘗見廣在路因呼與語還謂方曰

向見賢郎神姿朗徹當為名士卿家雖貧可令專學必
能大卿門戶方早卒廣孤貧僑居山陽人無知者性冲
澹與物無競尤善談論每以約言析理裴楷嘗引廣共
談自夕申旦嘆曰吾不如也王戎為荊州刺史聞廣為
夏候玄所賞乃舉為秀才楷又薦廣於賈充遂辟太尉
掾轉太子舍人尚書令衛瓘逮與正始中諸名士談論
見廣奇之曰自昔諸賢既沒常恐微言將絕而今乃復
聞斯言於君矣命諸子造焉曰此人之水鏡見之鑒然

若披雲霧而覩青天也王衍自言與人語甚簡及見廣
便覺已之煩其為有識嘆美如此出補元城令遷中書
侍郎轉太子中庶子累遷侍中河南尹廣善清言而不
長於文筆將讓尹請潘岳為表岳曰當得君意廣乃作
二百句語述已之志岳因次比便成名筆時人咸云若
廣不假岳之筆岳不取廣之旨無以成斯美也

原注晉書嘗有

親客久濶不復來廣問其故荅曰前在坐蒙賜酒方飲見盃中有蛇意甚惡之既飲而疾於時河南廳事壁有角漆畫作蛇廣意盃中蛇即角影也復置酒於前處謂客曰酒中復有所見否荅曰復見如初廣乃告以角

影容豁然意解沉疴頓愈衛玠總角時嘗問廣夢廣云
是想玠曰神形所不接而夢豈想耶廣曰因也玠思之
經日不得遂以成疾廣聞故命駕為剖析之玠
病即愈廣嘆曰此賢胸中當必無膏肓之疾 廣所在

為政無當時譽每去職遺愛為人所思凡論人必先稱
其所長則所短不言自見人有過先盡弘恕然後善惡
自彰廣與王衍俱宅心事外名重於時故天下言風流

者以王樂稱首

原注晉書廣少與弘農楊準相善準二
子喬髦皆知名準使先詣裴頠頠性弘

方愛喬有高韻謂準曰喬當及卿髦少減也又使詣廣
廣性清淳愛髦有神檢謂準曰喬自及卿髦亦自清出
準笑曰我二兒之優
劣乃裴樂之優劣也是時王澄胡毋輔之等皆任放為

達或至裸體者廣聞而笑曰名教中自有樂地何必乃

爾值世道多虞朝章紊亂清已中立任誠保素時人莫

見其際焉

原注晉書先是河南官舍多妖怪前尹皆不敢處正寢廣居之不疑嘗外戶自閉左右皆

驚廣獨自若顧見牆有孔使人掘牆得狸而殺之其怪遂絕

愍懷太子之廢詔故臣

不得辭送皆不勝憤嘆冒禁拜辭司隸校尉滿奮敕河

南中部收縛送獄廣即解遣衆為廣危懼孫琰說賈謐

曰前以太子罪惡有斯廢黜其臣不懼嚴詔冒罪而送

今若繫之是彰太子之善不如釋去謚然其言廣故得

不坐遷吏部尚書左僕射後安東王繇當為僕射轉廣
為右僕射領吏部代王戎為尚書令始戎薦廣而終踐
其位時人美之成都王穎廣之壻也及與長沙王乂構
難廣既處朝望羣小讒謗之乂以問廣廣神色不變徐
答曰廣豈以五男易一女乂猶以為疑廣竟以憂卒三
子凱肇謨凱字弘緒大司馬齊王掾參驃騎將軍事肇
字弘茂太傅東海王掾雒陽陷兄弟相攜南渡江謨字
弘範征虜將軍吳郡內史

謝鯤字幼輿陳國陽夏人也祖纘典農中郎將父衡國子祭酒鯤少知名通簡有高識不脩威儀好易老能歌善鼓琴王衍嵇紹並奇之永興中長沙王又輔政時有疾鯤者言將出奔又欲鞭之鯤解衣就罰曾無忤容既捨之又無喜色太傅東海王越辟為掾任達不拘尋坐家僮取官藁除名于時名士王玄阮脩之徒並以鯤初登宰府便至黜辱為之嘆恨鯤聞之方清歌鼓琴不以屑意鄰高氏女有美色鯤嘗挑之女投梭折其兩齒時

人為之語曰任達不已幼輿折齒鯢聞之傲然長嘯曰

猶不廢我嘯歌轉參軍事鯢以時方多故乃謝病去職

避地于豫章

原注晉書鯢嘗行經空亭中夜宿此亭舊每殺人將曉有黃衣人呼鯢字令開戶鯢

澹然無懼色便於窓中度手牽之胛斷視之鹿也尋血獲焉爾後此亭無復妖怪

左將軍王敦

引為長史以討杜弼功封咸亭侯母憂去職服闋遷敦

大將軍長史時王澄在敦坐見鯢談話無勸都不顧敦

敦有不臣之迹鯢知不可匡弼乃從容諷議而已每與

畢卓王尼阮放羊曼桓彝阮孚等縱酒敦以其名高雅

相賔禮嘗使至都明帝在東宮問曰論者以君方庾亮
自謂何如答曰端委廟堂使百僚準則鯤不如亮一丘
一壑自謂過之溫嶠嘗謂鯤子尚曰尊大君豈惟識量
淹遠至於神鑒沉深雖諸葛瑾之喻孫權不過也及敦
將為逆謂鯤曰劉隗奸邪將危社稷吾欲除君側之惡
匡主濟時何如對曰隗誠始禍然城狐社鼠敦怒曰君
庸才豈達大理出鯤為豫章太守又留不遣藉其才望
逼與俱下敦至石頭嘆曰吾不復得為盛德事矣鯤曰

何為其然但使自今以往日忘日去爾初敦謂鯤曰吾當以周伯仁為尚書令戴若思為僕射及至都復曰近來人情何如鯤對曰明公之舉雖欲大存社稷然悠悠之口實未達高義周戴南北之望明公舉而用之羣情帖然矣是日敦遣兵收周戴而鯤弗知敦怒曰君粗疎邪二子不相當吾已收之矣鯤與顗素相親重聞之愕然參軍王嶠切諫敦大怒命斬嶠人士畏懼莫敢言者鯤曰明公舉大事不戮一人嶠以獻替忤旨便以釁鼓

不亦過乎敦乃止敦既誅害忠賢稱疾不朝將還武昌
鯢謂敦曰公大存社稷建不世之勲然天下之心實有
未達若能朝天子使君臣釋然仗衆望以順羣情盡沖
退以奉主上如斯則勲侔一匡名垂千載矣敦曰君能
保無變乎對曰鯢近入覲主上側席遲公官省穆然必
無虞矣公若入朝鯢請侍從敦勃然曰正復殺君等數
百人亦復何損於時竟不朝而去時朝望被害皆為鯢
憂而鯢推理安常時進正言敦既不能用內亦不悅軍

還使之郡莅政清肅百姓愛之尋卒官年四十三敦死
追贈太常謚曰康

胡毋輔之字彥國泰山奉高人也高祖班漢執金吾父
原河南令輔之少擅高名有知人鑒嗜酒任縱不拘小
節與王澄王敦庾敳俱為太尉王衍所親狎號曰四友
澄嘗與人書曰彥國吐佳言如鋸木屑霏霏不絕誠為
後進領袖也辟別駕太尉掾並不就以家貧求試守繁
昌令始節酒自厲甚有能名遷尚書郎豫討齊王冏賜

爵陰平男累轉司徒左長史復求出為建武將軍樂安
太守與郡人光逸晝夜酣飲不視事成都王頴為太弟
召為中庶子遂與謝鯤王澄阮脩王尼畢卓俱為放達
嘗過河南門下飲河南騶王子博箕坐其傍輔之叱使
取火子博曰我卒也惟不乏吾事則已安復為人使輔
之因就與語嘆曰吾不及也薦之河南尹樂廣擢為功
曹東海王越聞輔之名引為從事中郎復補振威將軍
陳留太守王彌經其郡輔之不能討坐免官尋除寧遠

將軍揚州刺史不赴越復以為右司馬本州大中正越卒避亂渡江元帝以為安東將軍諮議祭酒遷揚武將軍湘州刺史假節到州未幾卒年四十九子謙之字子光才學不及父而傲縱過之至酣醉常呼其父字輔之正酣飲謙之闕而厲聲曰彥國年老不得為爾將令我尻背東壁輔之歡笑呼入與共飲年未三十卒

畢卓字茂世新蔡廬陽人也父諶中書郎卓少放達為胡母輔之所知太興末為吏部郎常飲酒廢職比舍郎

釀熟卓因醉夜至其甕間盜飲之為掌酒者所縛明旦視之乃畢吏部也遽釋之卓遂引主人飲於甕側致醉而去卓嘗謂人曰得酒滿數百斛船四時甘味置兩頭右手持酒盃左手持蟹螯拍浮酒船中便足了一生矣及過江為溫嶠平南長史卒官

光逸字孟祖樂安人也初為博昌小吏令使逸送客值雨雪舉體濕凍還遇令出逸解衣傅火卧令被中令還見之大怒將扶逸逸曰家貧衣單沾濕寒凍無可代者

若不覆被則已死矣何惜一被活一人乎令奇而釋之
後為門亭長迎新令至京師胡毋輔之與荀邃共詣令
家見逸謂邃曰彼似奇才便呼上車與談果傑士也令
怪客不入吏曰與逸語令怒除逸名遣之後舉孝廉為
州從事棄官投輔之輔之時為東海王越從事中郎薦
逸於越越即辟之尋避亂渡江復依輔之屬輔之與謝
鯤阮放畢卓羊曼桓彝阮孚散髮裸袒閉宇酣飲已累
日逸將排戶入守者不聽逸便於戶外脫衣露頂從狗

竇窺之大叫輔之驚曰他人必不能爾必我孟祖也遽呼入與飲不舍晝夜時人謂之八達共薦之元帝補軍諮祭酒後為給事中卒官

衛玠字叔寶年五歲丰神秀異祖父瓘曰此異兒也顧吾老不見其成爾總角乘羊車入市觀者傾疊皆以為玉人驃騎將軍王濟玠舅也雋爽有風姿每見玠輒嘆曰珠玉在側覺我形穢及長善言玄理多病體羸母恒禁其語遇有勝日親友時請一言無不咨嗟以為入微

琅邪王澄有高名少所推服聞玠言輒嘆服時人爲之
語曰衛玠談道平子絕倒玠妻父樂廣有海內重名議
者以爲婦公永清女壻玉潤辟命屢至皆不就久之爲
太傅西閣祭酒拜太子洗馬兄璪爲散騎侍郎玠將奉
母辟亂渡江臨別謂璪曰在三之義人之所重今可謂
致身之日兄其勉之遂渡江至豫章見大將軍王敦言
論彌日敦謂長史謝鯤曰昔王輔嗣吐金聲於中朝此
子復玉振於江表微言之緒絕而復續不意永嘉之末

復聞正始之音何平叔若在當復絕倒玠嘗以人有不
及可以情恕非意相干可以理遣故終身不見喜愠之
容以敦豪爽不羣而好居物上終非國之純臣辭敦適
建業每出觀者如堵羸疾益甚永嘉六年卒年二十七
時人謂玠被看殺後劉惔謝尚論中朝人士或問杜乂
可方衛洗馬不尚曰安得相比其間可容數人惔又云
杜乂膚清叔寶神清中興名士惟王承及玠為當時第
一云

議曰樂廣高簡尤善清談廁於二王之間不免為狂其
謂名教中自有樂地則異於彼狂矣初嵇康阮籍皆問
學淹博才藻邁逸自為一世高人勝士鄙鍾會之亂臣
絕師昭之賊子批讖朝列放心遺形則有激而然若畢
卓諸人中固無有至於甕間盜飲以為適閉室裸袒以
為達踰垣樓女以為淫闔戶字父以為酗特風俗之壞
無所忌顧邪廠跖弛至此極爾夫風俗天下之元氣也
甄陶之以教化維持之以紀綱整頓之以禮法變通之

以政事以為王風德化仁流善俗然後能保天命而延
國脉故夏之忠殷之敬周之文漢之質以為一代風俗
皆傳世數十歷年數百桓靈之季漢政始衰曹氏篡代
專尚威詐繼之以佻靡益之以浮華終為虛無狂誕三
代二漢之俗盡矣晉之君相不務更化重為倡導自比
於非類而淪於血肉又亡秦之所不為先正謂晉隋不
及秦有以矣夫

王濟字武子司徒渾之子也少有逸才風姿英爽氣蓋

一時好弓馬勇力絕人善易及老莊文詞俊茂與姊夫
和嶠及裴楷齊名尚常山公主年二十起家拜中書郎
以母憂去官起為驍騎將軍累遷侍中與侍中孔恂王
恂楊濟同列為一時秀彥武帝嘗會公卿藩牧於武乾
殿顧濟曰朕左右可謂恂恂濟濟矣每侍見未嘗不諮
論人物及時政得失濟善清言諷議將順朝臣莫及帝
益親貴之仕進雖速論者咸謂才能致之非主壻故也
然外弘雅而內多忌刻以父故每排王濬時議少之齊

王攸當之藩濟既陳請又累使公主與甄德妻長廣公主俱入稽顙泣請帝留攸帝怒謂侍中王戎曰兄弟至親今出齊王自是朕家事而甄德王濟連遣婦來生哭人以忤旨左遷國子祭酒常侍如故數年入為侍中時渾為僕射主者處事或不當濟性峻厲明法繩之素與從兄佑不平佑黨謂濟不顧其父出為河南尹未拜坐鞭王官吏免官而王佑始見委任濟遂被斥外乃移第北芒山下性豪侈麗服玉食時雒京地甚貴濟買地為

馬埒編錢滿之時人謂為金溝王愷以帝舅奢豪有牛
名八百里馭常瑩其蹄角濟請以錢千萬與牛對射而
賭之愷亦自恃其能令濟先射一發破的因據胡牀叱
左右速探牛心來須臾而至一割便去和嶠性至儉家
有好李帝求之不過數十濟候其上直率少年詣園共
啖畢伐樹而去帝嘗幸其宅供饌甚豐悉貯琉璃器中
蒸豚甚美帝問其故荅曰以人乳蒸之帝甚不平食未
畢而去濟善解馬性嘗乘一馬著連乾鄣泥前有水不

肯渡濟曰此惜郵泥也使人解去便渡故杜預謂濟有
馬癖帝嘗謂和嶠曰我將罵濟而後官爵之何如嶠曰
濟俊爽恐不可屈帝因召濟切讓之既而曰知愧否濟
荅曰尺布斗粟之謠常為陛下耻之他人能令親疏臣
不能使親親以此愧陛下爾帝默然帝嘗與濟奕碁而
孫皓在側謂皓曰何以好剝人面皮皓曰見無禮於君
者則剝之濟時伸脚局下故皓譏焉尋使白衣領太僕
年四十六先渾卒追贈驃騎將軍及將葬時賢畢至孫

楚雅敬濟而後來哭之甚悲哭畢向靈牀曰卿常好我
作驢鳴我為卿作之體似聲真客皆笑楚顧曰諸君不
死而令王濟死乎時吳蜀既平大臣鉅室寶貨充積豪
侈逐競而濟與石苞之子崇及王愷羊琇之徒以奢靡
相尚愷以糴澳金崇以蠟代薪愷作紫絲障四十里崇
作錦步障五十里崇塗屋以椒愷用赤石脂而武帝每
助愷嘗以珊瑚樹賜之高二尺許枝柯扶疏世所罕見
愷以示崇崇便以鉄如意擊之應手而碎愷以為嫉已

之寶聲色方厲崇曰不足多恨今當還卿乃命悉取珊瑚樹有高三四尺者六七株條幹絕異光彩耀日如愷比者甚衆愷恍然自失愷嘗置酒王敦與其從弟導俱在坐女妓吹笛少失聲韻愷便毆殺之使美人行酒勅客飲不盡即殺酒至敦所敦故不持觴美人悲懼失色及導導素不能飲彊為盡觴愷乃悅美人得免其驕豪如此識者知其亂將作也

議曰魏晉名教頽彫

原注文
爾反

喪心肆欲莫不夸毗為狂

高者既為曠達不經世務故下者溺於淫侈相與逐競

自天子親繫絳紗縱羊車而幸鹽竹

原注晉書泰始九年帝多簡良子女

以充內職自擇其美者以絳紗繫臂帝多內寵平吳之後復納孫皓宮人數千自此掖庭殆將萬人而並寵者甚衆帝莫知其所適常乘羊車恣其所之至便宴寢宮人乃取竹葉插戶以鹽汁灑地而引帝車於是

濟愷及崇窮奢角富糞土紈綉瓦礫珠璧歌兒舞姝麗

絕一世因以成俗至於東昏之躡金蓮

原注南史齊東昏侯鑿金為蓮

花以帖地令潘妃行其上曰此步步生蓮花也

長城之隆結綺

原注陳書後主於光昭殿前起

臨春結綺望仙三閣各高數十丈其牕牖壁帶縣楣欄檻皆以沉檀為之飾以金玉間以珠翠每微風漸至香

聞數

石邃血胭脂以列几案

原注晉載記石季龍以子邃為天王皇太子邃荒酒

淫色粧飾宮人美淑者斬首洗血置於盤上共傳視之

高洋斷股髀以為絃歌

原注

北史齊文宣斷美人股以爲琵琶曰佳人難再得

皆桀紂之所不為而自晉啓

之嗚呼學術之殺天下後世若是之酷哉

贊曰崇慝翔偽泯彛墮則放心遺形枵然自得勉勉貞

士甘為狂人遂俾魏晉復生一秦維綱解弛倫類戕弊

匪惟誤國又誤後世莊為老兵老乃佛媒敗俗叛道淪

胥為夷

